




通考

自二百三十六至二百四十四

二十九

112
100
39





112
100
39



文獻通考卷之二百三十六

宋鄱陽馬端臨 貴與
明蘄陽馮天馭 應屬 校

經籍考 集

司馬文正公傳家集

晁氏曰皇朝司馬光君實陝州夏縣人初以父蔭入官年二十舉進士甲科故相龐籍薦除館閣校理神宗即位擢翰林學士御史中丞後除樞密副使力辭而去元祐初拜門下侍郎繼遷尚書左僕射卒年六十八謚文正好學如飢之嗜食於學無所不通音樂律曆天文書數皆極其妙晚節尤好禮其文如金玉穀帛藥石也必有適於用無益之文未嘗一語及之集乃公自編次公薨子康又沒晁以道得而藏之中更禁錮迨至渡江幸不失墜後以授謝克家劉嶠刻版上之今

經籍

考

文獻通考卷之二百三十六

一

先

光州有集本

范蜀公集一百二十卷

汪玉山序按蜀公墓誌云文集一百卷諫垣集十卷內制集二十卷外制集十卷正書三卷樂書三卷公成都人也應辰守成都凡三年求公文集雖搜訪殆徧來者不一而竟無全書蓋公之沒距今八十年矣竊意歲月愈久則雖此不全之書亦或未易得也於是以意類次為六十二卷曰樂議曰使比錄不見於墓誌亦恐其初文集中未必載也而樂議或特出於世俗所哀輯今皆存之又以諫疏內制外制正書樂書附之通為一百十二卷正書所得止一卷今分為二司馬溫公論正書其間有云舜無焚廩浚井之事而今之正書無此語豈亦非全書邪

張少愚白雲集三十卷

晁氏曰張愈字少愚幼通悟於書無不該貫朝廷嘗以校書郎召表乞授其父隱於岷山之白雲溪凡六被徵召皆不起為文有西漢風嘗賦洛陽懷古蘇子美見而嘆曰優游感諷意不可盡吾不能也

文與可丹淵集四十卷

晁氏曰文同字與可蜀人進士高第以文學名操韻高潔畫筆尤妙仕至太常博士集賢校理元豐初出守吳興至宛丘驛忽留不行沐浴衣冠正坐而逝

東坡謂與可有四絕詩一楚詞二草書三畫四世少知者惟予一見識其妙處又有詩云斯人定何人游戲得自在詩鳴草聖餘兼入竹三昧他日觀其飛白復恨知與可之不盡也陳氏曰東坡與之厚善墨君堂記簞簞谷記皆為同作司馬溫公稱其襟韻瀟灑如晴雲秋月塵埃不到其為人可知矣

容齋洪氏隨筆曰今人但能知文與可之竹石惟東坡公稱其詩騷又表出美人却扇坐羞落庭下花之句予嘗恨不見其全比得蜀本石室先生丹淵集蓋其遺文也於樂府雜詠有秦王卷衣篇曰咸陽秦王家宮闕明曉霞丹文映碧鏤光彩相鈎加銅螭逐銀猊壓屋驚蟠峯洞戶瑣日月其中光景賒春風動珠箔鸞額金窠斜美人却扇坐羞落庭下花閑弄玉指環輕冰抱紅牙君王顧之笑為駐七寶車自卷金縷衣龍鸞蔚紛葩持以贈所愛結歡其無涯其語意深入騷人閭域又有王昭君三絕句云艷艷生殊域芳年入內庭誰知金屋寵只是信丹青幾歲後宮塵今朝絕國春君王重恩信不欲遣他人極目胡塵滿傷心漢月圓一生理沒恨長入四絃絃令人讀之縹縹然感慨無已也

元章簡玉堂集二十卷

陳氏曰參政錢塘元絳厚之撰絳之祖德昭相吳越本姓危氏唐末危全諷其伯父也父曰子倡兵敗自臨川奔杭州易姓元至今建昌撫州邵武多危姓絳能文辭晚歲以王介甫薦入翰林甚稱職遂擢用
晁氏曰絳鑠廳中進士第為翰林學士參知政事立朝無特操晚入翰林諂事王安石及其子弟時論鄙之工文辭為流輩所推許卒時年七十六

蒲左丞集十卷

晁氏曰皇朝蒲宗孟字傳正閬州新井人皇祐五年進士曾公亮薦除館職神宗謂宰相曰宗孟有史才乃同修國史入為翰林學士除尚書左丞卒年六十六為人酷暴奢侈蘇子瞻嘗規之云一日慈一日儉世以為中其膏肓之疾

趙懿簡集三十卷

晁氏曰皇朝趙瞻字大觀塾屋人少善為古文慶曆五年登進士第治平中為侍御史論濮邸事及貶元祐中終於同知樞密院謚懿簡學春秋著書十卷其他文不皆奇也

鮮于諫議集三卷

晁氏曰皇朝鮮于侁字子駿閬中人景祐中登進士乙科神宗初上書上愛其文以為不減王陶元祐中仕至諫議大夫侁治經術有法論著多出新意晚年為詩與楚詞尤精世以為有屈宋風族姪之武編次有序

東坡蘇氏曰鮮于子駿九誦友屈宋於千載上堯祠舜祠二章氣格高古東漢以來鮮及

少游秦氏曰公晚年為詩與楚辭尤精蘇翰林讀公八詠自謂欲作而不可得讀九誦以為有屈宋之風

石林葉氏曰晁無咎嘗云頃以諸生子見鮮于諫議子駿教

之為文曰文章但取簡易和緩不必奇險如詩言維北有斗不可以挹酒漿此豈不甚平後人因之乃曰援北斗酌酒漿一變雖奇以北斗為酌無已夸乎其甚遂有言上天揭取北斗柄辭至於此則已弊矣極以其言為然子駿在前輩詩文亦高古初世未有為騷者自子駿與文與可發之後遂有相繼得其味者也

呂正獻公集二十卷

陳氏曰丞相東萊呂公著晦叔撰

汪玉山序曰應辰頃知成都始得申正獻呂公集蓋散逸之餘哀輯補綴非當時全書矣然見所未見亦不為少其雜以他人所作者什三四既而以授公之曾孫金部員外郎企中金部又屬其兄子大麟大虬考訂刊刻為二十卷方全盛時士大夫家集之藏未必輕出中更黨禁愈益閱匿故一旦紛

經籍集 文獻通考卷三百三十六 四
擾遂不復見而此雖殘缺不全未易得也金部惻然念之欲以所得楔板庶廣其傳焉應辰方待罪太史論次熙寧元豐以來公卿大夫事實雖前修盛德蓋有不待言論風旨而知者然而傳信垂後不可以無證詔求遺書將以補史氏之缺久之無送官者每為之閣筆而嘆也

楊元素集四十卷

晁氏曰楊繪字元素漢州綿竹人幼警敏讀書一過輒誦至老不忘皇祐初擢進士第二人累擢翰林學士沈存中為三司使暴其所薦王永年事因貶官終於天章閣待制知杭州嘗居無為山號無為子為文立就

劉狀元東歸集十卷

陳氏曰大理評事鉛山劉輝之道撰輝嘉祐四年進士第一人堯舜性仁賦至今人所傳誦始在場屋有聲文體奇澁歐

陽公惡之下第及是在殿廬得其賦大喜既唱名乃輝也公為之愕然蓋與前所試文如出二人手可謂速化矣仕止於郡幕年三十六以卒世傳輝既見出於歐陽公怨憤造謗為猥褻之詞今觀楊傑志輝墓稱其祖母死雖有諸叔援古誼以嫡孫解官承重又嘗買田數百畝以聚其族而餉給之蓋篤厚之士也肯以一試之淹而為此儉薄之事哉

古靈集二十五卷

陳氏曰樞密直學士長樂陳襄述古撰襄在經筵薦司馬光而下三十三人皆顯于時紹興初詔旨布之天下集序李忠定網作

李誠之集三卷

晁氏曰李師中字誠之中進士科仁宗朝權廣南轉運使終天章閣待制唐子方貶春州嘗有詩送行盛傳一時

陳都官集三十卷

陳氏曰都官貢外郎嘉禾陳舜俞令舉撰舜俞慶曆六年進士嘉祐四年制科以言新法謫官南康與劉凝之騎牛遊廬山詩書皆傳於世舜俞居蘇秀境上初從安定胡先生學熙寧中六客其一也其墓在城南之蘇灣子孫猶宅於烏鎮

張文叔集四十卷

袁州判官張彥博文叔撰曾南豐敘略曰文叔年未三十喜從余問道理學為文章雖久窮而講道益明屬文益工其辭精深雅贍有過人者而比三遇之蓋未嘗為余出其文又知文叔自進為甚強自待為甚重皆可喜也

濂溪集七卷

陳氏曰廣東提刑管道周敦頤茂叔撰遺文纔數篇為一卷餘皆附錄也本名敦實避英宗舊名改焉其任以舅鄭向任

晚年以疾求知南康軍因家廬山前有溪取管道故居濂溪名之二程所從學也又本并太極圖為一卷遺事行狀附焉

明道集四卷 遺文一卷

陳氏曰監察御史河南程頤伯淳撰三司使羽之後也其父曰珣顯之叔文潞公題其墓曰明道先生

伊川集二十卷

晁氏曰崇政殿說書程頤正叔撰珣之子也少與其兄顥從汝南周茂叔學元祐初司馬溫公薦于朝自布衣擢說書未幾罷紹聖中嘗謫涪陵顥務讀經明道深斥辭章之學從其遊者多知名于世

陳氏曰集凡九卷

河南程氏文集十二卷

陳氏曰二程共為一集建寧所刻本

張橫渠崇文集十卷

晁氏曰張載字子厚京師人後居鳳翔之橫渠鎮學者稱曰橫渠先生呂晦叔薦之於朝命校書崇文未幾詔按獄浙東既歸卒

孫賢良進卷十卷

晁氏曰孫洙字巨源廣陵人歐陽永叔舉洙賢良上策論五十篇極論時事元豐中直學士院奉詔作靈津廟碑上稱洙學術行誼且大用之暴得風緩而卒或云上欲復大理獄洙對合旨由是驟進

錢賢良進卷十卷

晁氏曰錢公輔字君倚武進人從胡瓊學紹聖末知制誥

王直講集十五卷

陳氏曰天台縣令南城王無咎補之撰無咎嘉祐二年進會

鞏之妹夫從王安石遊最久將用為國子學官未及而卒為之誌墓曾肇序其集云二十卷今惟十五卷

南陽集二十卷

陳氏曰門下侍郎穎昌韓維持國撰封南陽郡公故以名集沈晦元用其外孫也卷首載鮮于綽所述行狀而晦跋其後南澗元吉無咎其四世孫

無為集十五卷 別集十卷

陳氏曰禮部郎需湏楊傑次公撰嘉祐四年進士元祐中為郎傑善談禪別集皆為釋老而釋又十之九

清江三孔集四十卷

陳氏曰中書舍人新淦孔文仲經父禮部侍郎武仲常父戶部郎中平仲毅父撰實先聖四十八世孫嘉祐六年八年治平二年連三科兄弟以次登第文仲舉賢良對策切直忤時

罷舉官范鎮景仁因求致仕而制科亦自此廢武仲為禮部
第一人中甲科平仲亦嘗舉制科其著述各數十篇多散逸
弗傳今其存者文仲才二卷武仲十七卷平仲二十一卷而
已慶元中濡湏王邁少愚守臨江哀集刊行而周益公必大
為之序序略曰遺文雖存一二於千百然讀之者知其為有
德之言非雕篆之習也昔黃太史頌當時人才有曰二蘇聯
璧三孔分鼎張丞相天覺在元符中詆元祐詞臣極其荒唐
謂兩蘇為狂率則剛直也謂公兄弟配之文行如何哉

西溪集十卷

陳氏曰翰林學士錢塘沈遵文通撰初以郊社齋郎舉進士
第一執政謂已宦者不應先多士遂居其次實皇祐元年自
是為故事文通吏事精明強敏為杭州開封府皆有能名從
容閑暇夙興治事及午而畢卒時年四十四餘其孫晦元用宣

和中亦魁天下

長興集四十一卷

陳氏曰翰林學士沈括存中撰括於文通為叔而年少於文
通世傳文通常稱括叔今四朝史本傳以為從弟者非也文
通之父扶扶之父同括之父曰周皆以進士起家官皆至大
常少卿王荆公志周與文通慕及遼誌其伯父振之墓可攷
括坐永樂事貶晚居京口自號夢溪翁自序甚詳云

山谷黃氏曰沈存中博極群書至於左氏春秋傳班固漢書
取之左右逢其原真篤學之士也

雲巢集十卷

陳氏曰審官西院主簿沈遼獻達撰遼親弟也以兄任為京
官坐法流貶事見揮麈錄自永徙池築室齊山號雲巢竟不
復起以上三集刊于括蒼號三沈集其次序如此

蘇魏公集七十二卷

陳氏曰丞相魏國公溫陵蘇頌子容撰紳之子也紳在兩禁人稱其險詖而頌器局闊厚未嘗與人較短長其為相在元祐末大臣奏事多稟宣仁獨頌必以白哲漸其後免於遷謫蓋上以為識君臣之禮故也年逾八十薨於建中靖國之初自草遺表却醫屏藥死生之際了然集前後序注藻周必大撰

呂晉伯輞川集五卷 奏議十卷

晁氏曰皇朝呂大忠字晉伯藍田人汲公之兄皇祐中進士除檢詳樞密院吏房文字為河北轉運判官累遷齊文閣直學士三帥秦鳳晉伯博極辭書為文尚理致有益於用章奏皆親為文

呂汲公文錄二十卷 文錄掇遺一卷

晁氏曰皇朝呂大防微仲京兆藍田人皇祐初中進士第哲宗即位召知制誥翰林學士拜尚書左僕射兼門下侍郎紹聖初責授舒州團練副使循州安置未踰嶺卒大防既拜相常分其俸之半以錄書故所藏甚富其在翰林書命典麗議者謂在元絳之上云

呂和叔誠德集三十卷

晁氏曰皇朝呂大鈞和叔嘉祐二年中進士第大防仲弟也終於宣義郎鄜延路漕司屬官師張厚之贍學博文無所不該其文非義理不發

呂與叔玉溪集三十五卷 玉溪別集十卷

晁氏曰皇朝呂大臨字與叔汲公季弟也登進士第嘗歷太學博士祕書省正字從程正叔張厚之學通六經尤精於禮解中庸大學等篇行于世嘗賦詩云學如元凱方成辟辭類

相如始近俳獨倚聖門無一事願同回也坐心齋正叔可之
朱子語錄曰呂與叔文集煞有好處他文字極是實說得好
處如千兵萬馬飽滿伉壯

傅獻簡集七卷

陳氏曰中書侍郎獻簡公河陽傅堯俞欽之撰

赤城集十卷

陳氏曰兩浙提刑寧海羅適正之撰治平二年進士學於四
明樓適為吏健敏頗為蘇子瞻劉貢父諸公所知公士有聞
於世自適始

西塘集二十卷

陳氏曰監安上門三山鄭俠介夫撰治平四年甲科小臣劇
上言人所不敢言上為之感動略施行其言不惟不怒而已
既而竟墮深譴良由呂惠卿欲傾王安石而俠與安國游從

厚善遂起獄并陷之俠既得罪新法遂不罷而本朝之禍本
成矣小人勿用之戒可不畏哉安石親惠卿而疎俠豈惟誤
國亦以危身後之君子可以監矣

范忠宣集二十卷

陳氏曰丞相忠宣公吳郡范純仁堯夫撰文正公之次子也
文正子四人長純佑尤俊有賢行早年病廢以死富文忠志
其墓近時禮部尚書之柔者其四世孫也次純禮純粹皆顯
用至大官

劉忠肅集四十卷

陳氏曰丞相忠肅公東光劉摯莘老撰凡四舉於鄉試禮部
為第一登嘉祐四年甲科劉元城為集序述其出處大槩
范子功集五十卷

晁氏曰范百祿字子功鎮之姪也終於中書侍郎

張浮休畫墁集一百卷 奏議十卷

晁氏曰張舜民芸叟邠州人慶曆中范仲淹帥邠見其文異之用温公薦為諫官仕至吏部侍郎後羈置房陵政和中卒其文豪重有理致而最刻意於詩晚年為樂府百餘篇自序稱年踰耳順方敢言詩百世之後必有知音者云自號浮休先生唐張鷟稱浮休子芸叟蓋襲之

陳氏曰舜民初用於元祐至元符末為諫大夫居職七日所上事六十章崇寧初坐謝表言紹聖逐臣有云脫禁錮者何止一十人計水陸者不啻一萬里又曰古先未之或聞畢竟不知其罪以為譏謗坐貶

范太史集五十五卷

陳氏曰翰林學士成都范祖禹淳夫撰

朱子語錄曰范淳夫文字純粹下一箇字便是合當下一箇

字東坡所以服他東坡輒七文字不將為事微時只胡亂寫去又曰四六語佳莫如范淳夫

灌園集三十卷

陳氏曰鄉貢進士呂南公次儒撰熙寧初試禮部不利會以新經取士遂罷舉欲修三國志題其齋曰衮斧書將成而死其書亦不傳元祐初諸公欲薦進之不及

伐檀集一卷

陳氏曰知廣州豫章黃庶亞夫撰自為序廷堅其子也世所謂山魃水恠著薛荔之詩集中多此體庭堅詩律蓋有自來也庶慶曆二年進士

黃魯直豫章集三十卷 外集十四卷

晁氏曰黃庭堅魯直也幼警悟讀書五行俱下數過輒憶蘇子瞻嘗見其詩於孫莘老家絕嘆以為世久無此作矣因以

詩往來會子瞻以詩得罪亦罰金元祐中為校書郎先是秦少游晁無咎張文潛皆以文學游蘇氏之門至是同入館世號四學士魯直之詩尤奇世又謂之蘇黃云紹聖初責置戎州至徽宗即位召還嘗因嘲諷忤趙正夫及正夫為相諭部使者以風旨所作承天院塔記中語以為幸災謗國遂除名編隸宜州以死崇寧四年也

家傳曰公既孤從舅尚書李公公擇學公擇嘗過家塾見其書帙紛錯因亂抽架上書問之無不通大驚以為一日千里蘇公嘗薦公自代其畧曰瑰瑋之文絕妙當世孝友之行追配古人世以為實錄公學問文章天成性得落筆妙天下晚節位益黜名益高世以配眉山蘇公謂之蘇黃公嘗游瀟院樂山谷寺石牛洞之林泉因自號山谷道人

史贊曰自李杜沒而詩律衰唐末以及五季雖有以比興自

名者然格下氣弱公靡靡無以議為也宋興楊文公始以文章蒞盟然至為詩專以李義山為宗以漁獵掇拾為博以儷花鬪果為工號稱崑崙體嫣然華靡而氣骨不存嘉祐以來歐公稱太白為絕唱王文公推少陵為高作而詩格大變高風之所扇作者間出班班可述矣元祐間蘇黃並世以碩學宏材鼓行士林引筆行墨追古人而與之俱世謂李杜歌詩高妙而文章不稱李翱皇甫湜古文典雅而詩獨不傳惟二公不然可謂兼之矣然世之論文者必宗東坡言詩者必右山谷其然豈其然乎山谷自黔州以後句法尤高筆勢放縱實天下之奇作自宋興以來二人而已

豫章別集一卷

陳氏曰皆集中所遺者如承天塔記黃給事行狀毀壁蓋其顯顯者也諸孫營子耕集而傳之

後村劉氏曰山谷文不如詩詩律不如古古不如樂府其文則專學西漢惜其才力褊局不能汪洋超超如其紀事立言頗時有類處

晁無咎雜助編七十卷

晁氏曰族父吏部公也公諱某字無咎幼蒙邁英爽不群七歲能屬文日誦千言王安國名重天下慎許可一見大奇之在杭州作文曰七述敘抗之山川人物之盛麗時蘇子瞻倅杭州亦欲有所賦見其所作嘆曰吾可以閣筆矣子瞻以文章名一時稱其博辨俊偉於文無所不能屈輩行與之交由此聲名籍甚舉進士禮部別試第一而考官謂其文辭近世未有遂以進御神宗曰是深於經可革浮薄元祐中除校書郎紹聖初落職監信州酒後知泗州終于官大觀四年也張耒嘗言無咎於文章英天性讀書不過一載終身不忘自少

為文即能追考屈宋班揚下逮韓愈柳宗元之作促駕而力鞭之務與之齊而後已其凌厲奇卓出於天才非醞釀而成者自韓柳而還蓋不足道也

山谷黃氏曰晁補之文章有漢唐間風味可以名世往未識晁無咎時見其作安南罪言天辨縱橫跋遮曲奧雅奇麗常恨同時而不相識其後得相從甚密今不見遂十五年計其文字皆當大進恨隨食南北不能相見耳

石林葉氏集序公少警悟絕人讀太史公書而善之以為可至遇有所得皆不由町畦自以意會其後益縱觀百家馳騁上下數千載無不咀其華而摘其實故公之文緩急豐約隱顯乘除粹不可以捕詰如終南太華峻拔連絡虎豹龍蛇騰攫變化至於優柔宏衍疎宕邃遠則朱絃疏越停雲淵泉可聽而不可求可望而不可挹也蓋常自謂喜左丘明檀弓屈

原莊周司馬遷相如枚乘及唐韓柳氏天下亦以為兼得數子之奧莫敢與之爭卒能自成一派晚惟文潛與之抗衡是以後世謂之晁張云

文獻通考卷之二百三十六

文獻通考卷之二百三十六

宋鄱陽馬端臨貴與著

明蘄陽馮天馭應房校刊

經籍考 集

張文潛柯山集一百卷

晁氏曰張耒字文潛譙郡人仕至起居舍人嘗為宣潤汝穎兗五州守又嘗謫居黃州復州最後居陳以沒元祐中蘇氏兄弟以文章倡天下號長公少公其門人號四學士文潛少公客也諸人多早沒文潛獨後亡故詩文傳於世者尤多其於詩文兼長雖同時鮮復其比而晚年更喜白樂天詩體多效之云

石林葉氏集序曰元祐間天下論文多曰晁張晁余伯舅無咎而張則文潛也文潛之文殆所謂若將為之而不見其為

經籍考

文獻通考卷二百三十六

三

三

者歟雍容而不迫紆裕而有餘初若不甚經意至於觸物遇變起伏歛縱姿度百出意有推之不得不前鼓之不得不作者而卒澹然而平盎然而和終不得窺其際也君與秦少游同學於翰林蘇子瞻子瞻以為秦得吾工張得吾易而世謂工可致易不可致以君為難云又曰無咎雄健峻拔筆力欲挽千鈞文潛容衍靖深獨若不得已於書者二公各以所長名家

秦少游淮海集三十卷

晁氏曰秦觀字少游高郵人登進士第元祐初除校勘黃本書籍紹聖中除名編隸橫州遇赦北歸至藤州卒蘇子瞻嘗謂李鷹曰少游之文如美玉無瑕又琢磨之功殆未有出其右者王介甫謂其詩新精婉麗鮑謝似之少游亦自言其文銖兩不差但以華麗為愧耳呂氏童蒙訓謂少游過嶺後詩

嚴重高古自成一家與舊作不同

文潛張氏曰予見少游投卷多矣黃樓賦哀鐘文卷卷有之豈其得意之文歟少游平生為文甚多而一一精好可傳玉山注氏曰居仁呂公云秦少游應制科問東坡文字科紐坡云但如公上呂申公書足矣故少游五十篇只用一格前輩如黃魯直陳無已皆極口稱道之後來讀書初不知其為奇也呂文所取者蓋以文章之工固不待言而尤可為後人模楷者蓋篇篇皆有首尾無一字亂說如人相見接引應對茶湯之類自有次序不可或先或後也

李方叔師友談記少游言邢和叔嘗曰文銖兩不差非秤上秤來乃等子上等來也某曰人入文章闕達者失之太踈謹嚴者失之太弱少游之文詞雖華而氣古事備而意高如鍾鼎然其體質規模質重而簡易其刻畫篆文則後之鑄師莫

彷彿宜乎東坡稱之為天下奇作也。非過言矣。少游論賦至
悉曲盡其妙。蓋少時用心於賦甚勤。而專常記前人所作一
二篇。至今不忘也。

陳無已后山集二十卷

晁氏曰。陳師道無已。彭城人。少以文謁曾南豐。南豐一見奇
之。許其必以文著。元祐中。侍從合薦于朝。起為太學博士。紹
聖初。以進非科舉而罷。建中靖國初。入秘書為正字。以卒。為
文至多少。不中意。則焚之。

石林葉氏曰。世言陳無已。每發覺得句。即急歸卧一榻。以被
蒙首。謂之吟榻。家人知之。即猫犬皆逐去。嬰兒穉子亦皆抱
持。寄隣家。徐待其起。就筆硯。即詩也。成乃敢復常。蓋其用意
專不欲聞人聲。恐亂其思。故詩中亦時時自有言吟榻者。天
下絕藝。信未有不精而能工者也。

朱子語錄曰。陳后山文有法度。如黃樓銘出。當時諸公皆歛
衽。便是今人都無他。抑揚頓挫。如仁宗飛白書記。大段好。曲
折甚多。過得好。墓誌亦好。有典有則。方是文字。其他文亦有
太局促不好者。后山文字簡潔極有法度。做許多碎句子。是
學史記。

劉夷叔曰。陳無已作文最苦。要是晁張諸人所不及。恨其稍
儉急。非謂文字簡勁為儉急。其詞氣自儉急耳。韓退之文字
多少。自然雄渾。

復齋讀錄曰。子瞻子由門下客。最知名者。黃魯直。張文潛。晁
無已。秦少游。世謂之四學士。至若陳無已。文行雖高。以晚出
東坡門故。不及四人之著。故無已作佛指記云。余以詞義名
次四君。而會於一代是也。而無已詩云。黃子似淵明。城市亦
復真。陳君有道舉。化行鄉井淳。張侯公瑾流。英思春泉新。高

才更難及。淮海一髯秦，當時以東坡為長公子，由為少公，無
已。客李端叔書云：蘇公門下有客四人，黃魯直、秦少游、晁無
咎、則長公之客也。張文潛則少公之客也。又次韻黃樓詩云：
一代蘇長公，四海名未已。又云：少公作長句，班馬安得擬。謂
二蘇也。然四客皆有所長，魯直長於詩，辭秦、晁長於議論，魯
直與秦觀書曰：庭堅心醉於詩，與楚辭似，若有得。至於議論
文字，今日乃當付之少游及晁，張無已足下可從此四君子
一一問之。其後文潛贈李德載詩亦云：長公波濤萬頃海，少
公峭拔千尋麓。黃節蕭蕭曰：下鶴陳子峭峭，霜中竹秦文倩
麗，紆桃李鼎論崢嶸，走珠玉乃知人才各有所長。雖蘇門不
能兼全也。

陳氏曰：廬山集十四卷，外集六卷，談叢六卷，理究一卷，詩話
一卷，長短句二卷，師道一字，履常蜀本但有詩文合二十卷。

按魏衍作集記云：離詩為六卷，類文為十四卷。今蜀本正如
此文，言受其所遺甲乙丙藁，詩曰五七，文曰千百。今四明本
如此。此本劉孝題刊於臨川，云未見魏全，仍其舊。十四卷為
正集，蓋不知其所謂十四卷者，止有文而詩不與也。外集詩
二百餘篇，文三篇，皆正集所無。談叢詩話或謂非廬山作，廬
山者其自號也。

濟南集二十卷

陳氏曰：鄉貢進士華山李薦方叔撰，又號月巖集。東坡知貢
舉得試卷，以為方叔也。置之首選，已而不然。賦詩有平生謾
說古戰場，過眼還迷日五色之句，後竟不第。

李文叔集四十五卷

後村劉氏曰：李格，非字，文叔，濟南人。詩文四十五卷，文高雅
條鬯有義，味在晁秦之上。詩稍不逮。元祐末為博士，紹聖始

為禮部郎有挽蔡相確詩云邴吉勤勞猶未報衛公精爽僅能歸豈蔡嘗薦引之乎挽魯直五言八句首云魯直今已矣平生作小詩下六句亦無褒辭文叔與蘇門諸人尤厚其殁也文潛誌其墓獨於山谷在日以詩往還而此詞如此良不可曉其過臨淄絕句云擊鼓吹竽七百年臨淄城闕尚依然如今只有耕耘者曾得當時九府錢試院五言云斗墮成小疾亦足敗吾勤定是朱衣吏乘時欲舞文亦佳作文叔李易安父也文潛誌言長女能詩嫁趙明誠又曰李文叔筆勢略與淇水相頡頏

畢公叔西臺集五十卷

晁氏曰畢仲游字公叔蚤登進士第元祐中召天下文學之士十三人策試翰林院蘇軾以公叔為第一除集賢校理又表自代云學曾經史才通世務文章精麗議論有餘自臺

郎為憲漕綽有能聲後入黨籍終于西京宛臺集陳叔易為之序

何博士備論四卷

陳氏曰武學博士浦城何去非正通撰去非以累舉對策稱旨授左班殿直教授武學後以東坡薦授承奉郎司農寺理通判廬州有文集二十卷未見

廖明略竹林集三卷

晁氏曰廖正一字明略元祐中召試館職蘇子瞻在翰林見其所對策大奇之俄除正字時黃秦晁張皆子瞻門下士號四學士子瞻待之厚每來必命侍妾朝雲取密雲龍家人以此知之一日又命取密雲龍家人謂是四學士窺之乃明略來謝也紹聖間明略貶信州玉山監稅鬱鬱不得志喪明而歿自號竹林居士

石林葉氏集序略曰明略嘗言吾深服左氏而樂道范曄之
秀正溫繹曄嘗自叙其書以為但多公家之言而少事外遠
致吾所恨亦云丘明不可及也異時有宜吾於曄伯仲之間
吾尚無愧往有評吾文似尹師魯者吾雖不學師魯然意善
其言是時余見明略文固多知其所自道不誣也明略自為
舉子時即不泐龔場屋一語再舉而取進士其所試傑然已
若可以名世者至今為學者推重蓋其用志深苦而思致精
毅淵源所從來者遠矣每一出語輒有區域町畦未有卒然
而作者至於出入經傳驅駕前言左攝右攝比次回曲他人
咀嚼稗杌終不能安者明略繩約隱括如以利刀摧朽木尺
箠呵群羊無不如意故其典奧簡潔音節遒峻精新煥發使
人讀之不覺矍然增氣惜其早困不得盡用所長始元祐初
天下所推文章黃張晁秦號四學士明略同直三館軒輊諸

公間無所貶屈欲自成一家然其流落不偶略相似云

邢敦夫呻吟集一卷

晁氏曰邢居實字敦夫和叔之子也年十四賦明君引蘇子
瞻見而稱之由是知名未幾和叔貶隨州敦夫侍行病羸嘔
血一日有鈴下老卒驕慢應對不遜敦夫怒而擊之無何卒
死和叔怒以敦夫屬吏以故疾日侵而夭故黃魯直為之挽
云眼看白璧埋黃壤何況人間父子情蓋隱之也集後有子
瞻魯直無咎諸公跋

陳氏曰幼有俊才名聲籍甚一時前輩皆憂之年十九而卒
宣仁之誣謗怒為之也居實未死或能當不義而爭萬一有
補於世道是以諸賢尤痛惜焉晁以道追為其墓表尤反復
致意

山谷黃氏序陽夏謝師復景回年二十文章不類少年書生

語言嘗序其遺藁云方行萬里出門而車軸折可為實涕今觀那敦夫詩賦筆墨山立自為一家甚似吾師復也秀而不實念之令人心折

東坡蘇氏跋敦夫自為童子所與交者皆諸公長者其志豈獨以文稱而已哉百不一見遂與草木俱腐故魯直無咎諸人哭之皆過期而哀江南李泰伯自述其文云天將壽我歟所為固未足也不然斯亦足籍手以見古人矣吾於敦夫亦云

王子立文集

王適子立撰穎濱蘇子由之壻也穎濱序略曰適從予為學長於詩騷予自南都謫居江南凡六年而歸未嘗一日不相從也既與予同憂患至於酒詠圖史馳騫浮圖老子之說亦未嘗不同之故其間道益深為文益高而予觀之益久蓋其

於兄弟妻子嚴而有恩和而有禮未嘗有過故予嘗曰子非獨余親戚亦朋友也

姑溪集五十卷後集二十卷

陳氏曰朝請大夫趙郡李之儀端叔撰嘗從東坡辟中山幕府後代范忠宣作遺表為世傳誦然坐是得罪編置當遠遂居焉其弟之純官至尚書

大名集四十卷

陳氏曰簽書樞密魏郡王巖叟彥霖撰韓魏公客也

錢塘韋先生集十八卷

陳氏曰主客郎中錢塘韋驥子駿撰皇祐五年進士元祐中以近臣薦為監司數路知明州以左朝議大夫致仕崇寧中乃卒少以詞賦有聲場屋王荆公喜其借箸賦頗稱道之陳師錫誌墓

強祠部集四十卷

陳氏曰三司戶部判官餘抗強至幾聖撰亦韓魏公客也在幕府表章書記多出其手曾南豐作集序稱其文備古今體兼人所長云

南豐曹氏序略曰幾聖工為詩語出驚人最為韓魏公所知魏公喜為詩每合屬賢士大夫賓客與游多賦詩以自見其屬而和之者幾聖獨思致逸發若不可追躡魏公未嘗不嘆其得之晚也其任幕府魏公每上奏天子以歲時慶賀問候及為書記四方之所好幾聖為屬藁草必聲比字屬曲當繩墨然氣質渾渾不見刻畫遠近多稱誦之及為他文若誌銘序記策問學士大夫則簡古而不少貶以就俗其所長兼人如此

唐子西集十卷

晁氏曰唐庚字子西眉山人登進士第早受知於張耒覺耒天覺為相擢京畿提舉常平且欲用為諫官天覺去位後言者謂子西常宣言有一網打盡之語貶惠州大觀五年會赦北歸

陳氏曰張商英拜相子西作內前行坐貶惠州歸蜀而卒其文長於議論所著名治存舊正友議賞諸論皆精確

鴈湖李氏曰唐子西文采風流人謂為小東坡

劉夷叔曰唐子西善學東坡量力從事雖少自成一家其詩工於屬對緣此遂無古意然其品在小游上

後村劉氏曰子西諸文皆高不獨詩也其出稍晚使及坡門當不在秦晁之下

竹溪林氏曰唐子西學東坡者也得其氣骨而未盡其變態之妙間有直致處然無一點塵俗亦佳作也

馬子才集八卷

陳氏曰鎮南節度推官鄱陽馬存子才撰元祐三年進士第
四人

研軒程氏曰子才文波瀾雄壯英毅有奇氣不可繫維且徐
節孝蘇文忠許可最厚淵源有所自矣或疑其過於豪放故
宦業不甚顯以沒是未免以成敗論也方新學盛行士皆以
穿鑿恠誕相高子才自上庠奉大對首闢災異曲說歸諸人
事至論外患則略西南而獨斥北方淵然有為國經久意不
溺時好卓卓如此既沒之後川黨議起蘇黃文字焚毀無遺
而子才亦在指揮中故世罕傳復訛舛近得其族黨所儲
善本參以板行者精加正是釐為十一卷凡為策二策題四
時論三史論二十二古詩四十六律詩五十絕句八十四記
十一序八書四啓七文疏八雜著四誌銘十三又為年譜列

於墓碣之次以詳其出處大率得之傳聞雖未保其無謬其
於尊慕師匠則深有意焉既成有示以舊刊進策十六卷似
非本真故不敢附著云

先公曰子才諸史論如論晉人以父母之邦委之於群胡殘
暴戮辱百餘年間無有奮發以生吾中國之氣又安得有奇
士哉又論後魏謂中國以禮義文綵之腴而飼禽獸之飢此
之謂不幸非吾一人可與之爭古之善戰者能用天下之氣
而已矣嗚呼安得此語聞於炎紹中天之初乎子才從節孝
徐先生游且久其文章雄直雅似節孝今取徐集中所贈三
詩係家集後并書其說云

斜川集十卷

陳氏曰通直郎蘇過叔黨撰世號小坡坐黨家不得仕進終
於通判中山府晁以道誌墓稱其純孝給事中嶠其孫也

九峰集四十卷

陳氏曰太常少卿眉山蘇元老在廷撰東坡從孫也坡在海
上嘗有書往來其罷奉常歸穎昌正坐元祐邪等未幾遂卒
年四十七

清真集二十四卷

陳氏曰徽猷閣待制錢塘周邦彥美成撰元豐七年進汴都
賦自諸生為太學正邦彥博文多能尤長於長短句自度曲
其提舉大晟府亦由此既盛行於世而他文未傳嘉泰中四
明樓鑰始為之序而太守陳杞刊之蓋其子孫家居四明故
也汴都賦已載文鑑世傳賦初奏御詔李清臣讀之多古文
奇字清臣誦之如素所習熟者乃以偏傍取之爾鑰為音釋
附之卷尾

清真雜著三卷

陳氏曰邦彥嘗為溧水令故邑有詞集其後有好事者取其
在邑所作文記詩歌并刻之

寶晉集十四卷

陳氏曰禮部員外郎襄陽米芾元章撰其母閻氏與軍仁在
藩時有舊故以后恩補試銜入仕其上世皆武官蓋國初勳
臣米信之後也視芾為五世孫酷嗜古法書家藏二王真跡
故號寶晉齋

玉池集十二卷

陳氏曰考功郎湘陰鄧忠臣慎思撰熙寧三年進士坐元符
黨廢不用言者論其議范忠宣誣過實又坐罰銅崇觀間卒
平生著述至多嘗和杜詩全帙又嘗獻郊祀慶成賦又原廟
詩百韻裕陵喜之擢為館職今皆軼弗得所存一二而已玉
池其所居山峯名

樂靜集三十卷

陳氏曰起居舍人鉅野李昭玘李成撰元豐二年甲科所居有樂靜堂故以名集其姪邠漢老為書其後

雲龍李氏曰序略曰東坡罷徐守時伯父以書抵之坡答書歷道黃張晁秦數公且曰此數子者挾其有餘之姿而為無涯之知必極其所如往而後已則此安所歸宿哉惟明者念有以反之其意蓋以彼為不然而勉其有所至也惟伯父性誠乎忠厚故其為文橫驚別驅曲折演迤而一貫於理有萬折必東之勢志樂于靖退故其為文粹然其立淵然其止不侈衆目而風神自遠有父幽而不改其操之美學博而思精故其為牋奏應用之作傳古切今琢削德密不傷天骨叙事外自為文章才贍而意新故其為詩奇麗愜適章斷句絕餘思羨溢得詩人味外之味此其大略也

陳瑩中了齋集三十卷

晁氏曰陳瓘字瑩中延平人建中靖國初為右司諫嘗移書責曾布及言蔡京及弟卞之姦惡章數十上除名編隸合浦以死靖康中贈諫議大夫自號了翁

陳氏曰汪應辰為集序以為出死力攻權姦者天下一人而已非虛語也又有約論十七卷起戰國至後漢安帝蓋讀通鑑隨事有所發明也

陳司諫集兩卷

晁氏曰陳祐字純益仙井監人登進士第建中靖國初為臺諫與龔夬任伯雨江公望協力彈擊紹聖姦臣後蔡京用事廢斥而沒

節孝集二十卷

陳氏曰趙州教授山陽徐積仲車撰治平四年進士以耳聵

不能任事母極孝行義純篤古所謂卓行也東坡謂其詩文
恠而放如玉川子政和中賜謚節孝處士

學易集二十卷

陳氏曰朝奉郎東光劉跋斯立撰忠肅公擊之長子也與其
弟蹈同登元豐二年進士第元祐初以其父在言路政府不
得用紹聖以後復坐黨家連蹇終其身晁景迂志其墓比孫
明復石守道之徒為文無所不長宣陽宮賦學易堂記世傳
誦之

田承君集三卷

陳氏曰太宗正丞陽翟田書承君撰書樞密况之姪也與鄒道
鄉善鄒之貶書曰願母以此舉自滿士所當為者未止此也
道鄉集四十卷

陳氏曰吏部侍郎晉陵鄒浩志完撰浩既諫立劉后坐貶徽

宗初召還對上首及之皇嘆再三問諫草安在曰焚之矣退
告陳瓘瓘曰禍其始此乎異時姦臣妄出一絨則不可辨矣
蔡京素忌之使其黨作偽疏言劉后殺卓氏而奪其子遂得
罪其在昭州作青詞告上帝有追省當時奏御之三章初無
殺母取子之一字云

波娑集三十卷

陳氏曰右正言陽翟崔鶻德符撰鶻坐元符上書邪等廢於
家治圃號波娑靖康初召為諫官力論馮澥之罪忽得瘵疾
不能行而卒無子其壻衛昂哀輯其遺文
晁氏曰鶻元符末上書入邪等廢斥幾三十年其為文最長
於詩清婉敷腴有唐人風

劉巨濟前溪集五卷

晁氏曰劉涇字巨濟蜀人終於太學博士為文奇怪

李元應跨鰲集五十卷

晁氏曰李新字元應仙井監人早登進士第劉涇嘗薦于蘇子瞻令賦墨竹中占一絕立就坐元符末上書奪官謫置遂州流落終身跨鰲仙井山名也

滿氏昌色集二十卷

晁氏曰滿中行字思復登進士第元豐中為太學官虞蕃獄起思復獨不結吏議詔宥之

馮允南集十卷

晁氏曰馮山字允南普州人鄧綰為中丞薦為臺官允南力辭不就士論稱之

滴水集四十卷

陳氏曰集英殿修撰長安李復履中撰元豐二年進士博學有氣節其為熙河漕有旨造戰艦戰車復奏議者之謬以為

兒戲遂罷其議時論避之

晁氏景迂集十二卷

晁氏曰從父詹事公也諱某字以道文元公玄孫少慕司馬温公為人自號景迂生年未三十蘇子瞻以著述科薦之元符中上書居邪中等博極群書通六經尤精於易傳邵堯夫之學著太極傳縉紳高其節行嘗守成州時民訴歲旱公以為十分益蠲其稅轉運使大怒督責甚峻因丐老而歸靖康初以著作郎召遷祕書監免試除中書舍人兼太子詹事俄以論不合去國建炎初終於徽猷閣待制

陳氏曰徽猷閣待制晁說之以道撰又本止刊前十卷說之平生著述至多兵火散逸其孫子健哀其遺文得十二卷續廣之為二十卷別本刊前十卷而止者不知何說也劉跂斯立墓誌景迂所撰見學易集後而此集無之計其逸者多矣

說之元豐五年進士元祐初蘇文忠范太史曾文昭皆薦之
坐元祐邪等廢棄靖康末始為從官

晁氏崇福集三十五卷四六集十五卷

晁氏曰從父崇福公也登進士第又中宏詞第一元符末上
書居邪等廢斥二十年以朝請郎奉祠崇福宮而終故以名
集天才英特為文章立成明潤密緻世以為宜在北門西掖
云

陳氏曰朝請郎晁詠之道撰景迂弟也為作集序詠之初
以蔭為揚州法曹東坡守揚族兄無咎為倅以其文呈東坡
及至揚詠之具參軍禮趨謁坡走下庭攜手以上謂坐客曰
此奇才也

晁氏封丘集二十卷

晁氏曰世父封丘府君諱 字伯宇鑠廳中進士第黃魯直

嘗薦之於蘇子瞻云晁伯宇謹厚守文元家法從游多長者
其文已能如此年蓋未二十也願一語教戒之子瞻答云晁
伯宇詩騷細看甚奇麗信乎其家多異材也雖然凡文至足
之餘溢為奇偉今晁文涉奇似太早可作朋友切磋之語以
告之非謂其諱也恐傷其邁往之氣耳後坎壈終身卒官封
丘丞

陶山集二十卷

陳氏曰尚書左丞山陰陸佃農師撰

東堂集六卷 詩四卷 書簡一卷 樂府二卷

陳氏曰祠部郎江山毛滂澤民撰滂為杭州法曹以樂府詞
有佳句受知於東坡遂有名嘗知武康縣縣有東堂集所以
名也又嘗知秀州修月波樓為之記其詩文視樂府頗不逮

溪堂集二十卷

陳氏曰臨川謝逸無逸撰

竹友集十卷

陳氏曰臨川謝邁幼槃撰逸從弟也呂居仁題其後曰逸詩似康樂邁詩似玄暉

浮沚先生集十六卷 後集三卷

陳氏曰秘書省正字永嘉周行已恭叔撰十七入太學有盛名師事程伊川元祐六年進士為博士太學以親老歸教授其鄉再入為館職復出作縣永嘉學問所從出也鄉人至今稱博士集序林鉞撰先祖妣先生之第三女先君之所自出故知其本末所居謝池坊有浮沚書院

橘林集十六卷 後集十五卷

陳氏曰密州教授石忞敏若撰崇寧壬午以同進士出身中詞科其文彫琢怪竒殊乏醞藉厭卷策問言王金陵配享先聖事謂其以百聖芻豢甘四海口以六經河漢洗四海心以九達夷路破四海迷以萬金良藥起四海病讀之不覺大笑其人與文皆不足道也集僅二冊而卷數如此麻沙坊本往往皆然

文獻通考卷之三百三十七

文獻通考卷之二百三十八

文獻通考卷之二百三十八

宋鄱陽 馬端臨 貴與 著

明蘄陽 馮天馭 應房 校刊

經籍考 集

龍雲集三十二卷 附錄一卷

陳氏曰著作佐郎廬陵劉弁偉明撰元豐進士紹聖詞科曾
慥詩選以比石敏若非其倫也龍雲安福縣鄉名弁所居也
周平園序略曰廬陵自歐陽文忠公以文章續韓文公正傳
遂為本朝儒宗繼之者龍雲劉公文忠薨於穎公方冠不及
從之游然斯文未喪何害其為韓門籍湜也先是汴京及麻
沙刻公集二十五卷紹興初會昌尉羅良弼徧求別本增至
三十二卷凡六百三十餘篇予嘗論公之文如南郊賦氣格
近先漢已為泰陵簡擢詩書序記往往祖述韓柳間或似之

經籍考 集 文獻通考卷之二百三十八

經籍 集 卷之三

銘誌豐腴規摹文忠讀者可以自見其才學出處具載李彥弼誌銘羅氏跋語云

東觀餘論三卷

陳氏曰秘書郎昭武黃伯思長睿撰伯思右丞黃履之孫吳園張根之壻於李忠定綱為中外襟袂故忠定誌其墓伯思元符庚辰進士年四十而死好古博雅喜神仙家言自號雲林子別字霄賓有集一百卷此書止法帖刊誤及序跋古畫畫器物故名餘論

北湖集十卷 長短句一卷

陳氏曰直秘閣知虢州富川吳則禮子副撰其父中復以孫朴薦為御史不求識面臺官者也中復弟幾復嗣復子立禮及嗣復子審禮皆登科有名譽則禮以父澤入仕晚居豫章號北湖居士

劉左史集四卷

陳氏曰起居郎永嘉劉安節元承撰與從弟安上皆嘗事二程同遊太學號二劉安節元符三年進士為察官左史晚知宣州以歿

箕穎集二十卷

陳氏曰穎昌曹組元寵撰組本與兄緯有聲太學亦能詩文而以滑稽下俚之詞行於世得名良可惜也謝克家任伯為集序其子勛跋其後略見其出處蓋宣和三年始登第郊禮進祥光賦有旨換武階兼閣職詔中書召試仍給事殿中未幾而卒然集中有謝及第啓自叙云蚤預諸生竟叨右列則未第之前已在西班未知何以也曾慥詩選云六舉不第宣和中詔赴廷試賜第啓中所謂特舉孱微許從俊造慥之言良是序跋不著其實爾

經籍 集 卷之三 劉氏

夷白堂小集二十卷 別集三卷

陳氏曰考功員外郎括蒼鮑慎由欽止撰元祐初以任子試吏部銓第一復登六年進士乙科甫脫選即為郎然自是數坐累官竟不進其父粹始居吳故葬於吳興

青溪集十卷 附錄一卷

陳氏曰楚州教授臨川江革信民撰紹聖四年試禮部第一遂登甲科蔡京當國召為宗子博士力辭不就年才四十卒呂原明志其墓晁以道為詞以哀之革嘗有言曰咬得菜根則萬事可做誠名言也

王谿集二十二卷

陳氏曰左司員外郎永嘉倪濤巨濟撰其父始徙居廣德濤大觀三年進士燕山之役誦言其非以沮軍罷謫衡州茶陵以死年三十九呂居仁志其墓曾吉父為作集序

竹隱畸士集四十卷

陳氏曰右文殿修撰韋成趙鼎臣承之撰元祐甲科紹聖宏詞又自號葦溪翁其孫綱立刊于復州本百二十卷刊止四十卷而代去遂止

後湖集十卷

陳氏曰丹陽蘇庠養直撰其父堅伯固亦有詩名庠以遺澤畀其子而自放江湖間東坡見其清江曲大愛之由是得名僧祖可正平號癩可者其弟也庠中子扶亦工詩有清苦之節庠紳之後頌之族

劉給事集五卷

陳氏曰給事中劉安上元禮撰紹聖四年登第歷書臺諫掖垣鎖闥以次對歷三郡而終集中有彈蔡京疏

童貢集二十卷

陳氏曰祕書監李朴先之撰紹聖元年進士坐言隆祐之賢廢三十年蔡京欲強致之不屈其教授西京國子監也程伊川與之甚厚然謂其太直以洛中風波為戒朴笑曰不意此言發於先生之口伊川為之改容愧謝其風節可畏也

呂吉甫集二十卷

晁氏曰呂惠卿字吉甫閩人王安石執政擢參知政事元祐初謫知福州紹聖後累領藩鎮有莊子解為文長於表奏後村劉氏曰考亭論荆公東坡門人寧取呂吉甫而不取秦少游輩其說以為吉甫猶看經書少游翰墨而已孫鴻慶序其文謂辭嚴義密追古作者

李淇水集八十卷

陳氏曰門下侍郎大名李清臣韓魏公壻治平二年中制科歐陽公愛其文以比蘇軾其為人亦寬博有度而趣時嗜譽

利首主紹述之論意規宰相亦卒不如其志

張無盡集三十二卷

晁氏曰張商英字天覺登第調官峽路章惇察訪巴蜀風采傾動西南峽中部使者憂之日夕謀所以待之之禮曲盡因求辯博之士以備燕談或以天覺姓名告因檄召至夔州惇既至杯酒間果以人材為問部使者即言之惇令召入天覺不冠服裁巾長揖徑就坐左惇負氣敢大言天覺輒吐言壓之惇大喜歸而薦于朝由是召用元祐中為開封府推官出使河東紹聖初擢御史大觀四年長星見蔡京罷相乃拜右僕射盡反京之政召用元祐遷客天下翕然歸重暮年去位靖康初遂與司馬溫公范文正公同日降制加贈官爵賜謚文忠

臨漢隱居集二十卷

經籍

集

文獻通考卷三百二十八

四

沛

晁氏曰魏泰字道輔襄陽人曾布子宣之妻弟幼爽邁能屬文嘗從徐禧晚節卜隱漢上人頗言其倚子宣之勢為鄉里患苦云

梅文安集十五卷

陳氏曰戶部尚書浦江梅執禮和勝撰執禮死於靖康之禍人固哀其不幸而不知吳革趙子昉之謀執禮實主之事既泄范瓊殺革徐秉哲以子昉遺虜虜知執禮預謀以根括金銀為罪問誰為長官意在執禮也安扶恐其坐之遂曰皆長官也遂俱死文安者所封開國縣也

李忠愍集十二卷

陳氏曰吏部侍郎臨洛李若水清卿撰後二卷為附錄其死事時才三十五歲本名若冰以靖康出使改今名詩文雖不多而詩有風度文有氣槩足以知其所存矣

傅忠肅集三卷

陳氏曰待制濟源傅察公晦撰堯俞從孫也宣和七年以吏部郎接伴虜使虜人入寇使人不來為虜驅去幹高不魯使拜不屈見殺周平園序其集謂公文務體要辭約而理盡甚類獻簡詩尤溫純該貫間次險韻愈多而愈工

歐陽脩撰集六卷

陳氏曰崇仁布衣贈祕閣修撰歐陽徹德明撰徹死年三十一環溪吳沆哀其詩為飄然集三卷而會稽胡衍晉遠取其所上三書併刻之臨川粹解

丁永州集三卷

陳氏曰知永州吳興丁注葆光撰元豐中余中榜進士喜為歌詞世所傳催雪無悶及重午慶清明皆有承平閑雅氣象有女適樂清令富春李素見素實先妣之大父母也

演山集六十卷

陳氏曰端明殿學士延平黃裳勉仲撰元豐二年進士第一人貴顯於崇觀死於建炎年八十七方三舍法行裳謂宜近不宜遠宜少不宜老宜富不宜貧不如遵祖宗科舉之制世傳以為口實

梁溪集一百二十卷

陳氏曰丞相忠定公昭武李綱伯紀撰父夔進士起家至右文殿修撰黃右丞履之甥也綱娶吳園先生張根之女亦右丞外孫梁溪名集者修撰葬錫山忠定嘗廬墓云

襄陵集二十四卷

陳氏曰尚書右丞襄陵許翰松老撰元祐三年進士靖康初入西府建炎為丞轄與黃潛善輩不合而去

黃唐集三十卷

陳氏曰尚書右丞瑞安許景衡少伊撰亦嘗從程氏學建炎初為執政與汪黃不合罷建議渡江幸建康言者以為非是及下還京之詔景衡憂卒于瓜州未幾虜騎奄至維揚倉卒南渡

呂忠穆集十五卷

陳氏曰丞相濟南呂頤浩元直撰後三卷為燕魏雜記古今事卷末言金人亂華始末甚詳

忠正德文集十卷

陳氏曰丞相聞喜趙鼎元鎮撰四字高廟所賜宸翰中語也周平園序略曰公為中丞上語范宗尹云鼎在言路極舉職所言四十事已施行三十六益祖宗初除言事官即置簿載所言事日多寡當否已行即朱銷其下外庭未必知也暨入相虜震合肥決策親征慮無遺策益公氣節端方學術純正

筆力又過人凡處分軍國機務多其視草然後御劄付外惟德與文又孰加此

龜山集二十八卷

陳氏曰工部侍郎延平楊時中立撰時及從明道死當建炎四年年八十七於程門最為壽考

尹和靖集一卷 附集一卷

陳氏曰徽猷閣待制河南尹焞彥明撰子漸之孫年十九舉進士策問欲誅元祐黨籍不對而出遂罷舉靖康賜號和靖處士虜陷洛陽闔門遇害死而復蘇門人潛載以逃客涪州以范元長薦入經筵擢列侍從葬會稽山

胡文定公武夷集十五卷

陳氏曰給事中崇安胡安國康侯撰紹聖四年進士第三人仕四十年實歷不及三載著春秋傳行於世本喜為文後篤

志於學乃不復作其辭召試曰少習藝文不稱語妙晚捐筆藻纔取理明既覺昨非更無餘習故其文集止此

致堂叙略曰惟鄒魯之學由秦漢隋唐莫有傳授其間名世大儒僅如佛家者流所謂戒律講論之宗而已至於言外傳心直超佛地則未見其人是以聖道不絕如綫曰筆袞袞異乎身踐有書徒存猶無書也逮及我宋熙寧以來先覺傑出上繼回軻天下英才心悅而誠服然後孔氏述業浸以光顯五經語孟所載譬如逢春之木有本之澗生意流形初非死質成已成物始終有序先臣夙稟大志聞而知之以仁為居以義為用以身修家齊國治天下平為効若夫記誦訓詁辨說詞華之習不一與焉其宏綱大用奧義微詞既於筆削之書發揮底蘊自餘因事有作進則陳之君父退則語於公卿或酬酢朋游或訓教子弟一言一話猶足以證明往昔昭迪

來今敢圖家藏遂上御府斯文不墜後裔有榮然父書精深而臣以粗淺之言冠于篇首君學高遠而臣以卑近之論瀆于聰明茲榮也祇所以為愧歟

朱子語錄曰胡文定公文字皆實但奏議每件引春秋亦有無其事而遷就之者大抵朝廷文字且要論事情利害是非令分曉今人多先引故事如論青苗只是東坡兄弟說得有精神他人皆說從別處去

默堂集二十二卷

陳氏曰宗正少卿延平陳淵知默撰一字幾叟了翁之姪孫楊龜山門人紹興初嘗為諫官

致堂斐然集三十卷

陳氏曰禮部侍郎胡寅明仲撰文定公長子也本其兄子初生棄不舉文定收育之既長俾自絕於本生不為心喪止服

世父之服寅遵行之集中有與秦丞相書言之甚詳人倫之變古今所未有也寅宣和進士紹興初已為從官不主和議秦檜本與其父子有契分竟謫新州檜死北歸歿於岳州

五峯集五卷

陳氏曰右承務郎胡宏仁仲撰文定季子不出仕篤意理學南軒張栻其門人也別本不分卷

王履道初寮集十卷 內制十八卷 外制八卷

晁氏曰王安中字履道真定人政和中有密薦于上者自監大名倉累擢掌內外制後拜太保鎮燕山建炎初貶象州為文瓌奇高妙最長於制誥李邴入翰林嘗請於上以方今詞林之式上首尾舉安中之名自號初寮

陳氏曰安中年十四薦于鄉凡四舉乃登第為中司受旨攻蔡京京子攸入禁中日夕泣涕告于上安中亟改翰苑事遂

止其自政府出守燕京父子排之也然安中之進亦本由梁師成始東坡帥定武安中未弱冠猶及師事焉未卒業而坡去其後晁以道為無極今安中既第修邑子禮用長牋自言以新學竊一第為親榮非其志也以道曰為學當謹初何患不遠到安中築室榜曰初寮其議論聞見多得於以道既貴顯遂諱晁學但稱成州使君四丈無復先生之號矣甚哉籍湜不畔之難也

雲龕李氏序略曰本朝承五季之後楊劉之學盛于一時其裁割纂組之工極矣石介憤然以楊公破碎聖人之道為世巨害著論排之甚力然當時文宗鍾儒司翰墨之職者亦必循本朝故事如近世張公安道高簡粹純王公禹玉溫潤典裁元公厚之精麗穩密蘇東坡先生雄深秀偉皆制詞之傑然者壁夏之王良造父策驥騶而騁康莊一日千里而節以和

鑿馳之蟻封亦必中度豈能彼而不能此哉初寮先生太保王公自布衣以文稱天下由東觀入掖垣由烏府登鼂禁皆天下第一選司內外制者累年其所製體大而義嚴事覈而旨深奇而不失正雄而不為夸褒動勞則有帶礪丹青之信施霈宥則有雨露涵濡之澤文治平則祥極乎鳳麟申戒飭則誠著乎金石嘉武節則毅乎彪虎之威美文德則昭乎藻火之華極其致益與本朝三數公不相上下而馳驟乎燕許常揚之域若不以體制拘之駸駸乎漢氏矣蓋公天才英邁筆力有餘於文於詩皆瓌奇高妙無所不能故出為世用者如此自徽宗皇帝即位以來擅制誥之美者公一人而已得不謂一代之奇文歟

周平園序略曰公年二十有七游五臺為竹林泉賦以將相喻泉石格高而意新送某贈大父詩云不論與汝小一月政

自容君數百人專用吾宗公瑾伯仁事致推尊年德之意精切混成不類少作時方諱言蘇學而公已潛啓其秘鑰又之徽宗旁求文士召宣館閣給札親試驟掌書命由中司入北門歷二轄其制誥表章詩文大率雅重溫潤而時發秀傑之語定功繼伐等碑睿謨曲宴百韻詩多出特命上恩與天通矣萬目睽睽徒謂其鶴鳴九皋而不知奪胎換骨自有仙手故未嘗以曲學指之今前集四十卷是也中興南渡四海名勝遷謫避地萃于湖廣而公壻趙竒子辟章又家之游夏大篇短章更唱迭和既已盡發平昔之所蘊且復躬閱事物之變益以江山之助心與境會意隨辭達韻遇險而反夷事積故而逾新他人瞠乎其後我乃綽有餘裕至如桂柳佛寺諸記閎深辯麗近坡莫年之作黃張晁秦既沒系文統接隊緒誰出公右豈止襲其裳佩其環而已乎後集十卷是也

汪彥章浮溪集六十卷

陳氏曰翰林學士婺源汪藻彥章撰四六偶儷之文起於齊梁歷隋唐之世表章詔誥多用之然今徠楚李商隱之流是為能者殊不工也本朝楊劉諸名公猶未變唐體至歐蘇始以博學富文為大篇長句叙事達意無艱難牽強之態而王荆公尤深厚爾雅儷語之工昔所未有紹聖後置詞科習者益眾格律精嚴一字不苟錯若浮溪尤其集大成者也孫鴻慶序言其文貫穿百氏網羅舊聞文從字順體製亦渾然不見刻畫如金鐘大鏞叩之輒應當大典冊深淳雅健追配古作所謂常楊燕許諸人皆莫及也

石林總集一百卷 年譜一卷

陳氏曰尚書左丞吳郡葉夢得少蘊撰紹聖四年進士崇觀間驟貴顯三十一歲掌外制次年遂入翰林中廢至建炎乃

執政然才數日而罷平生所歷州鎮皆有能聲胡文定安國嘗以其蔡穎南京之政薦于朝謂不當以宿累廢晚兩帥金陵當元木臨江移三山平群寇其功不可沒也秦檜秉政欲令帥蜀辭不行忤檜意以崇慶節度使致仕其居在卞山奇石森列藏書數萬卷既沒守者不謹屋與書俱燼於火石林二字本出楚辭天問

石林建康集十卷

陳氏曰皆帥建康時詩文其初以所莅官各為一集後其家編次總而合之此集其一也

石林審是集八卷

陳氏曰其門人盛光祖子紹所錄亦已入總集

翟忠惠集三十卷

陳氏曰參政丹陽翟汝文公異撰汝文制誥古雅多用全句

氣格渾厚近世罕及夫人邢氏恕之女居實其弟也長子者季實邢出好古博文高尚不仕忠惠者私謚也

鴻慶集四十二卷

陳氏曰戶部尚書晉陵孫覲仲益撰大觀三年進士政和四年詞科代高麗謝賜燕樂表膾炙人口生元豐辛酉卒乾道己丑蓋年八十九可謂耆宿矣而其平生出處至不足道也嘗提舉鴻慶宮故以名集

周平園序略曰公軼群邁往賦才獨異而復天假之年磨淬鍛煉重之以湖山之助名章雋語少而成壯而盈晚而愈精靖康時為執法詞臣其章疏制誥表奏往往如陸敬輿明辯駿發每一篇出世爭傳誦老年為論譏次對親為謝表啓各出新意用事屬詞少壯所不逮

蔡北海集六十卷

陳氏曰翰林學士北海蔡卞禮叔厚撰工於四六秦檜初罷相卞禮當制有御筆詞頭藏其家檜再相下台州追索時卞禮已死幸不及禍

雲龕草堂後集二十六卷

陳氏曰參政鉅野李邴漢老撰明受之變以兵部侍郎直學士院叱責兇渠朝廷賴焉既復辟首擢執政周益公作神道碑言前後集一百卷今惟後集蓋皆南渡後所作也朱文公為之序漢老樂靜右史之姪五世祖濤五代時宰相石晉之亂弟幹在翰林陷於虜及邴立節於建炎而弟鄴守會稽亦隨金人北去世以為異

龜谿集十二卷

陳氏曰知樞密院忠敏吳興沈與求必先撰建炎紹興之間歷三院翰苑以至執政嘗奏言王安石之罪大者在於取揚

雄馮道當時學者惟知有安石喪亂之際甘心從偽無伏節死義之風實安石倡之此論前未之及也紹興七年終于位

陳參政簡齋集二十卷

晁氏曰陳與義字去非汝州葉縣人中進士第宣和中徽宗見其所賦墨梅詩喜之遂登冊府建炎中掌內外制拜參知政事以卒晚年詩尤工周葵得其家所藏五百餘篇刊行之號簡齋集

陳氏曰去非其先蓋蜀人東坡所傳陳希亮公弼者其曾祖也崇觀間尚王氏經學風雅幾廢絕而去非獨以詩名中興後遂顯用

後村劉氏曰元祐後詩人迭起一種則波瀾富而句律疎一種則煅煉精而情性遠要之不出蘇黃二體而已及簡齋出始以老杜為師墨梅之類尚是少作建炎以後避地湖嶠行

路萬里詩益奇壯元日云後飲屠蘇驚已老長乘舴艋竟安
 歸除夕云多事鬢毛隨節換盡情燈火向人明記宣靖事云
 東南鬼火成何事終待胡鋒作爭臣謂方臘不能為岳陽樓
 云登臨吳蜀橫分地徙倚湖山欲暮時又云乾坤萬事集雙
 鬢臣子一謫今五年聞德音自古安危閑政事隨時憂喜
 到樵漁五言云泊舟華容縣湖水終夜明凄然不能寐左右
 旅蕭聲窮途事多遠勝處心亦驚三更螢火開萬里天河橫
 腐儒憂平世况復值甲兵終焉無寸策白髮滿頭生造次不
 忘憂愛以簡嚴掃繁縟以雄渾代尖巧第其品格當在諸家
 之上

惲膝先生文集

尚書郎三峒喻汝礪撰後溪劉氏序略曰靖康之難屢議立
 偽楚以絕民望先生惲其膝曰此膝豈可屈哉即日挂冠

武門遂自號惲膝居士由是名重海內先生之於學不古不
 好於文不古不嗜於事不古不愜故其於名節不古不止也
 既沒六十三年而文集始出嗚呼此豈如時花候禽可悅一
 時耳目之比宜其愈久而愈難泯也蓋先生之文一字不肯
 苟於下筆每篇率能馳騁上下濤起阜湧力有餘而氣不竭
 辭既工於理與事又欲明白而深切其得無傳乎

昭德晁公文集六十卷

侍郎晁公武子止撰後溪劉氏序略曰國家丙午之變中原
 衣冠不南渡則西入于蜀其入于蜀者有能言當時理亂興
 喪之由而明乎得失之跡歷歷道往事誦京洛之遺風者鮮
 矣藉令有之而能達之乎文辭可使耳目尚接乎而後之人
 有傳焉者亦又鮮焉昭德晁公益能言當時理亂興喪之由
 而明乎得失之跡道往事誦遺風而又能達之乎文辭以傳

者也其經事之多嘗艱之久而學日益強文日益力猶以為未足其答進士劉興宗書曰僕少時貫穿群書出入百氏旁逮釋老恢詭之學一再終星其勤亦至矣亡得焉反而求之六藝似於道有見也乃願師董仲舒心竒賈生而病其雜也則公之學可觀矣

宇文肅愍公文集

贈開府儀同三司宇文虛中撰後溪劉氏序略曰公羈絕域者十五年而朝廷悉發其家人北去後四年父子謀覺而闔門被禍矣公弟兄早以才奮皆致位二府公之文章又最先稱於當世余讀其為館職時所與開封尹論事書而壯之使充是書以往足以追古人而並駕公既亟見用於尚文之日潤色太平勸藻休烈則余其所謂繫一時所遇而非公之所欲充而不已者也故公答曾晦之書云僕長而游太學為

科舉所使及得一官又屢為應制代言之文皆非得已而為者去歲得罪杜門于此閑取篋中書中卧而讀之日盡數卷乃知古人之未嘗為文也惟其無意於為文而遇事乃言則其優游舒泰奮迅豪蕩蓋無施而不可昔嘗謂西漢制詔妙絕於元成間而章疏奏對至谷子雲而工極無以復加矣迨今思之則不然惟高帝立長沙王令諸吏善遇高爵及省賦舉賢等詔呂后孝文賜匈奴單于書楚王信以下上尊號相國何等議天子所服此等數篇卓然溫成非司馬相如王褒輩冥搜巧繪所能至也公之此書至論古之人成德為行隱然出處之大致亦非有意於其間又觀所與趙慶長論文書亦曰不若清明寥邈之為愈也挺臣欲表出其先大父之文即二書所言余又何加焉

杜起莘文集

殿中侍御史杜莘老起莘撰後溪劉氏序略曰公學術之正文辭之典氣節之剛與王公龜齡大略相似而公奮起孤遠為尤難余嘗得公奏疏而讀之其言五穀藥石也公卒四十餘年余守眉陽又得公他文閱之嘆曰善哉窮之言達之行也今年又得公經論千餘篇信乎公之學得於孟子者歟世益降士之為文益浮噫無復斯文也已

西山老文集二十四卷

豫章胡直孺少汲撰紹興中仕至刑部尚書孫鴻慶序略曰公少工於詩語出驚人魯直一見擊節嘆賞指示佳處數十語表而出之他文稱是筆力雄贍所為賦頌表啓記序銘贊之屬蓋數萬言如行雲流水自然成文

胡承公集十卷 資古紹志集十卷

晁氏曰胡世將字承公中進士科早受知晁無咎建炎南渡

嘗直學士院終於資政殿學士川陝宣撫使為文敏贍雅掌書命頗有能聲喜聚金石刻效歐公集古錄為資古紹志集序云以成其先人之志故以紹志名其書

陳氏曰文恭公宿之曾孫以兵部侍郎為川陝副宣金虜敢盟繼吳玠之後經畫守禦以迄和議再成分疆未定死於河池世將好古博雅有資紹志錄倣集古錄跋尾亦見集中謚忠獻

邵氏集二十卷

晁氏曰邵溥字澤民進士第靖康初為戶部侍郎上踐祚以例貶官紹興中復待制宣撫川陝師事崇福十二父詩文早有能聲

文獻通考卷之二百三十八

文獻通考卷之二百三十九

宋鄱陽 馬端臨 貴與 著

明蘄陽 馮天馭 應房 校刊

經籍考 集

空青遺文十卷

陳氏曰直寶文閣曾紆公卷撰紆布之子有異材建中靖國初布在相位奉詔為景靈西宮碑紆之筆也建炎紹興之際將漕江浙入為司農少卿知信衢州以卒汪彥章志其墓孫仲益序其文王銍性之其壻也

孫鴻慶序公文章固守家法而學詩以母夫人魯國魏氏為師句法清麗絕去刀尺有古詩之風黃魯直遷宜州道出零陵得公江越書事二小詩書團扇上諸詩人莫能辨也

先公序畧曰余自誦涪翁扶藜對蘚之吟曲阜把卷臨燈之

句固已慕用公衮才章之盛顧前修日遠自乾淳諸老文字猶多遺落况過江前後間乎一日西泉吳太史爲言此吾鄉空青公也有集藏于家余惟空青公子弟起家文章繼世潛逃於家君柄用之時繾綣於諸賢流落之後未幾滅跡毀廬相隨入黨迄天地重開迨能以三朝正論暴白於世視同時諸貴公子孫所謂繼志述事者其爲人賢不肖何如也昔石林葉公以親見揚雄美其詩以新樣元和評其書以三世風流頌其文近世李鴈湖亦謂人惡雋異俗疵文雅如空青諸人雖不偶於一時而文采爛然垂後著世不能掩也今其遺文如魯殿秦碑見者珍惜自可孤行於南豐曲阜之後云

北山小集四十卷

陳氏曰中書舍人信安程俱致道撰俱父祖世科而俱乃以外祖鄧潤甫蔭入仕宣和中賜上舍出身爲南宮舍人紹興

初入西掖徐俯爲諫大夫封還詞頭罷去後以次對修史病不能赴而卒

石林葉氏序畧曰余居吳始識致道見其學問風節卓然有不獨見於其文者即爲移書當路并上其文數十篇宰相見而驚曰今之韓退之也亟召見政事堂其後二十四年間卒登侍從爲天子掌制命文章擅一時今觀其文精確深遠議論皆本仁義而經緯錯綜之際則左丘明班孟堅之用意也至於詩章兼得唐中華以後名士衆體晚而在朝雖不久遇所建明尤偉蓋其爲人剛介自信擇於理者明所行寧失之隘不肯少貶以從物是以善類皆相與推先惟恐失之雖有不樂之者亦不敢秋毫加疵病信乎直道之不終屈也

陵陽集五十卷

陳氏曰中書舍人仙井韓駒子蒼撰自幼能詩黃大史稱其

超軼絕塵蘇文定以比儲光義游太學不第政和初獻書召
試出身後入西掖坐蘇氏鄉黨曲學罷

丹陽集四十二卷後集四十二卷

陳氏曰顯謨閣待制江陰葛勝仲魯卿撰紹聖四年進士元
符三年詞科洪慶善序其文有所謂絕郭天信拒朱勔斬盛
章而怒李彥者蓋其平生出處之略也再知湖州後遂家焉
孫鴻慶序略曰公中宏詞第一時天子輯瑞應蒐講彌文報
禮上下四方以符瑞來告者不可勝數大臣表賀皆出公手
壞竒英麗獨步一時公卿交譽屢遷擢大司丞遂躋法從

毗陵集五十卷

陳氏曰參政文清毗陵張守全真撰一字子同崇寧進士詞
科紹興執政張魏公在相位薦秦檜再用守有力焉一日與
魏公言某誤公聽今朝夕同班列得款曲其人似以曩者一

跌為戒有患失心宜自効謝上魏公為作墓志志著其語

張章簡華陽集四十卷

陳氏曰參政金壇張綱彥正撰大觀中舍法三中首選釋褐
為承事郎辟雍正蓋專於新學者紹興初在瓊闈忤張俊求
去復與秦隙遂引年秦亡乃召用乾道初年八十四而終自
號華陽老人華陽者茅山也

非有齋類藁五十卷

陳氏曰給事中吳興劉一止行簡撰宣和三年進士居瓊闈
僅百餘日忤秦檜罷去閑居十餘年以次對致仕檜死被召
力辭進雜學士而終年八十二實紹興庚辰

竹西集十卷西垣集五卷

陳氏曰兵部侍郎惟揚王居正剛中撰宣和三年進士紹興
初入詞掖西垣集者制草及繳章也其篇目凡繳章皆云封

還詞頭蓋其子孫編次者之失也除授則有詞頭政刑庶事何詞頭之有

張巨山集三十卷

陳氏曰中書舍人光化張嶠巨山撰嶠為司勳郎官金人再取河南秦相皇恐上章引伊尹善無常主及周任不能者止之文以自解嶠之筆也秦德之遂擢修注掌制而其具藁倉卒誤以伊尹告太甲為告湯及周任之言為孔子自言時祕書省寓傳法寺有書其門曰周任為孔聖太甲作成湯秦疑諸館職為之多被逐然嶠亦以答檜三析肱之語謂其貳於已無幾亦罷

默成居士集十五卷

陳氏曰中書舍人潘良貴子賤撰一字義榮剛介之士也朱侍講序其集略見其出處大致

朱子序略曰公自宣和初為博士則已不肯託昏富貴之家而獨嘗論斥大臣蒙蔽之姦及為館職又不肯游蔡京父子門使淮南又不肯與中官同燕席靖康召對因論時宰何臬唐恪不可用恐誤國事以是謫去不旋踵而言果驗建炎初召為右司諫首論亂臣逆黨當用重典以正邦法壯國威且及當時用事者姦邪之狀大為汪黃所忌書奏三日而左遷以去紹興入為都司又忤時相以歸復為左史直前奏事明大公至正之道服喪還朝又以廷叱奏事官而忤旨以去自是之後秦檜擅朝則公遂廢於家而不復起矣然公平生廉介自持自少至老出入三朝而前後在官不過八百六十餘日所居僅庇風雨郭外無尺寸之田經界法行獨以丘墓之寄輸帛數尺而已其清苦貧約蓋有人所不堪者而處之超然未嘗少屈於檜其子熺暴起鼎貴勢傾內外亦未嘗與通

問也嘗誦君子三戒之言而深以志得之規痛自儆飭至於造次之間一言一行凡所以接朋友教子弟亦未嘗不以孝弟忠敬節儉正直防微謹獨之意為本其讀書磨鏡之喻切中學者之病當世蓋多傳之而所論汲長孺蓋寬饒之為人尤足以見其志之所存也嗚呼若公之清明直諒確然亡慾其真可謂剛毅而近仁矣夫以三代之時聖人之世而夫子已嘆剛者之不可見况於百世之下幸有如公者焉而不得以申其志以沒其條奏草藁有補於時可為後法者又以公自焚削而不復存其平生之言頗可見者獨有賦詠筆札之餘數十百篇而已後之君子蓋將由此以論公之事其可使之沒沒無傳而遂已乎

筠谿集二十四卷

陳氏曰戶部侍郎連江李燠遜似之撰大觀三年上舍第一

知冀州能抗金賊攝江東帥與忠定平周德之亂晚為從官沮和議坐廢而終

鄱陽集十卷

陳氏曰微猷閣直學士鄱陽洪皓光弼撰皓奉使金虜守節不屈既歸為秦所忌謫英州死之日與秦適相先後三子登詞科俱顯貴

東窻集四十卷

陳氏曰中書舍人鄱陽張廣彥實撰與呂居仁為詩友其在

西掖當紹興十一年

雪溪集略八卷

陳氏曰汝陰王銍性之撰國初周易博士昭素之後也其父萃樂道嘗從歐公學銍為曾紆壻嘗撰七朝國史紹興初常同子正薦之詔視科史官給札奏御會秦氏柄國中止書竟

不傳其子明清著揮塵錄

竹軒雜著十五卷

陳氏曰太常少卿永嘉林季仲懿成撰以趙元鎮薦入朝奏
疏沮和議得罪仲熊叔豹季狸其弟也皆知名

北山集三十卷

陳氏曰端明殿學士金華鄭剛中亨仲撰紹興二年亞魁受
知秦相使川陝後忤意貶死封州

澹庵集七十八卷

陳氏曰端明殿學士忠簡廬陵胡銓邦衡撰建炎甲科第五
人既上書乞斬秦檜謫嶺海秦死得歸孝宗即位始復官召
用又以沮再和之議得罪去乾道中入為丞郎亦不容於時
奉祠至淳熙七年乃終七十九

平園周氏跋曰胡忠簡公詩有不可及者三用事博而精下

語家而華一也士子投獻必用韻酬答雖百韻亦然愈多而
愈工二也此篇和王君行簡時年七十五長歌小楷與四五
十人無異三也誠齋序先生之文肖其為人議論闕以挺其
記序古以馴其代言典而嚴其書事約而悉其為詩蓋自詆
斥時宰誕置嶺海愁猶酸骨飢咬血牙風呻雨喟濤瀟波詭
有非人間世之所堪耐者不芥於心而反昌其詩視李杜夜
郎夔子之音益加恢竒云至於騷詞涵茫蘄萃鉢剡刻屈扶
天之幽洩神之瘦樞癯而不瘁恫愀而不對自宋玉而下不
論也

李文簡公集一百二十卷

敷文閣學士丹稜李燾仁父撰水心集序曰自有文字以來
名世數十大抵以筆勢縱放凌厲馳騁為極功風霆怒而江
河流六驥調而八音和春輝秋明而海澄嶽靜也高者自能

經籍 集 卷之三十九
餘則勉而効之矣雖然此韓愈所謂下逮莊騷其上無是也
觀公大篇詳而正短語簡而法初未嘗藻黼琢鏤以媚俗為
意曾點之瑟方希化人之酒欲清又非以聲色臭味自怡悅
也獨於古文隊學堂上之議起廬造周如切裘領振之焉固
遺其下而獨至其上者歟蜀自三蘇死公父子兄弟後起兼
方合流以就家學綜練古今名實之際有補於世天下傳以
繼蘇氏云

沈子壽文集

水心集序曰吳興沈子壽少入太學名聞四方仕四十餘年
絀於王官再入郡三佐帥幕公私憔悴而子壽老矣然其平
生業嗜文字若性命在身非外物也甲乙自著累百千首嗚
呼何其勤且多也余後學也不足以識子壽之文其不為音
險而瑰富精切自然新美使讀之者如設芳醴珍饈足飲厭
食而無醉飽之失也又能融釋衆疑兼趨空寂讀者不惟醉
飽而已又當消愠忘憂心舒意閑而自以為有得於斯文也
觀其開闔疾徐之間旁觀而橫陳逸騫而高翔蓋宗廟朝廷
之文非自娛於幽遠淡泊者也

徐斯遠文集

水心集序曰斯遠盡平生文僅二十餘首首輒精善疑其親
自料揀應留者止此爾徐觀筆墨輕重以十一斂藏千百雖
鋪寫縱放亦無怠惰剝落之態迷流陡起體勢各成殆非精
揀所能致也詩險而肆對面崖壑咫尺千里操舍自命不限
常律慶曆嘉祐以來天下以杜甫為師始黜唐人之學而江
西宗派章焉然而格有高下技有工拙趣有淺深材有大小
以夫汗漫廣莫徒枵然從之而不足充其所求曾不如脰鳴
吻映出豪芒之奇可以運轉而無極也故近歲學者已復稍

趨於唐而獲焉曷若斯遠淹玩衆作凌暴偃蹇情瘦而意潤
貌枯而神澤既能下陋唐人方於宗派斯又過之斯遠有物
外不移之好負山林沉痼之疾而師友學問小心抑畏異方
名聞之士未嘗不遐歎長想千里而同席也初渡江時上饒
號稱賢俊所聚義理之宅如漢許下晉會稽焉風流幾泯議
論將絕斯遠與趙昌父韓仲止扶植遺緒固窮一節難合而
易忤視榮利如土梗以文達志爲後生法凡此皆強爲善者
之所宜知也

相山集二十六卷

陳氏曰朝奉大夫濡須王之道彥猷撰宣和六年兄弟三人
同登科建炎寇亂率衆保明避山從之者皆得免以功改京
官沮和議得罪晚乃歷麾節其子蘭被遇阜陵貴顯

韋齋小集十二卷

陳氏曰吏部員外郎新安朱松喬年撰侍講文公之父也文
公嘗言韋齋先生自爲兒童時出語已驚人及去場屋始放
意爲詩文其詩初亦不事彫飾而天然秀發格律間暇超然
有出塵外之趣

關博士集二十卷

陳氏曰太學博士錢塘閔注子通撰紹興五年進士嘗爲湖
州教授自號香巖居士

石月老人集三十五卷

陳氏曰朝議大夫致仕鄱陽余安行勉仲撰安行累舉不第
其子應求以童子登崇寧五年進士科爲御史歷麾節所至
迎養其父至九十六乃終著書號至言蓋純篤之士也

王著作集四卷

陳氏曰著作郎福清王蘋信伯撰從程門學以趙忠簡薦召

對賜出身秦檜惡之會其族子坐法牽連文致奪官以死

屏山集二十卷

陳氏曰通判興化軍崇安劉子翬彥冲撰父幹兄子羽子翬以蔭入仕年甫四十八而卒朱文公其門人也嘗謂朱曰吾少聞佛老之說歸讀吾書然後知吾道之大體用之全如此於易得入德之門為作復齋銘聖傳論可以見吾志矣

東溪集二十卷

陳氏曰迪功郎漳浦高登彥先撰考試湖州策問忤秦相譴死

水心葉氏序略曰君高遠獨出無拘留泥濘間意學已成謂當直施用不曲步捷行以漸巧取之論說必窮盡欲礙時陋扶世壞文不為扶踈茂好惟自根極二而成者無不具也故不得志於科舉至轉富入貧本業微折以終不動心一以溪山雲

月為家宅筆墨簡策為情性常覃研竟日曰孔顏不如是也

潘經堂集八卷

陳氏曰知盱台軍東平畢良史少董撰文簡公士安五世孫嘗陷虜有從之游者因為圖名繙經寫其訪問細繹之狀

三近齋餘錄

朝奉郎知信州王從正夫撰從文正公五世孫有詩文四百八十餘篇自題三近齋餘錄楊誠齋序略曰其詩如落木森猶力寒山淡欲無如地迥高樓目天寒故國心如涼風回遠笛暝色帶歸舟如塵心依水淨歸鬢與山青不減晚唐諸子如墮藥盡應輸燕懶寒猶及占梨花知一番風雨催寒食千里鶯花想故園如身閑更得憑陵酒花早殊非愛惜春如秋生列岫雲猶薄泉瀨懸崖路更怪置之江西社中何辨幽蘭云臨春慘不舒蓋國空自香意不在蘭也至於騷辭如釣

臺沐髮乞巧悼亡等篇出入遠游天問之海頡頏幽通思玄之囿矣及上前論事之文皆卓然近用又如盞殮豆肉之可以求飽筭裳篋續之可以御冬使其遇合功用詎可量哉紀之靡鄭之瓚積而不離瘞而不起久則光怪四出貫日襲月有不可掩者惟不求知所以不可掩也歟

藥寮叢稿二十卷

陳氏曰太常少卿上蔡謝伋景思撰參政克家之子

水心葉氏序略曰崇觀後文字散壞相矜以浮肆於險膚無據之辭苟以蕩心意移耳目取貴一時雅道盡矣謝公尚童子脫巾髦游太學俊筆湧出排窄老蒼而不能不受俗學薰染自漢魏根底齊梁波流上遡經訓旁涉傳記門樞戶鑰庭旅陞列撥弁組繡考擊金石洗削纖巧完補大樸其藥園小畫記蓋謝靈運山居之約言志潔而稱物芳無憂憤不堪之情也

巖壑老人詩文一卷

陳氏曰左朝請大夫洛陽朱敦儒希真撰初以遺逸召用嘗為館職既挂冠奏檜之孫埴欲學為詩起希真為鴻臚少卿將使教之

鶴溪集十二集

陳氏曰辟雍博士青田陳汝錫師予撰紹聖四年進士持節數路帥越而卒青田登科人自汝錫始希點子與其孫也

岳武穆集十卷

陳氏曰樞副鄴郡岳飛鵬舉撰飛功業偉矣不必以集著也世所傳誦其質和議一表當亦是幕客所為而意則出於岳也

漢濱集六十卷

漢濱集

集

文獻通考卷三百三十一

十一

目錄

陳氏曰參政襄陽王之望瞻叔撰周益公為集序序略曰公
生於羊杜成功之地慕其為人博學能文知略輻湊學根於
經故有淵源文適於用故無枝葉奏劄甚多皆可行之言內
制雖少得坦明之體酷嗜吟咏詞贍而理到近世論文章事
業公實兼之豈與夫一偏一曲之士較短量長而已

王山翰林詞草五卷

陳氏曰尚書王山汪應辰聖錫撰紹興五年進士首選本名
洋御筆改賜天才甚高而不喜為文謂不宜弊精神於無用
然每作輒過人以天官兼翰苑近二年所撰制誥溫雅典實
得王言體朱晦翁稱為近世第一

太倉稊米集七十卷

陳氏曰樞密編修宣城周紫芝少隱撰自號竹坡居士

白蘋集四卷

陳氏曰右文林郎單父龐謙孺祐甫撰莊敏公籍之曾孫也
用季父恩仕不遂而死韓南澗志其墓嘗客居吳興故集名

白蘋

南澗甲乙藁七十卷

陳氏曰吏部尚書潁川韓元吉無咎撰門下侍郎維之玄孫
與其從兄元龍子雲皆嘗試詞科不利居廣信溪南號南澗
艇齋雜著一卷

陳氏曰南豐曾李狸表父撰鞏之弟曰湘潭主簿宰宰之孫
曰大理司直晦之季狸其子也多從呂居仁徐師川游曾一
試禮部不中乾淳間名公多敬畏之具見其子維所集師友
尺牘此篇蓋其議論古今之文辭而質義正可以得其人之
大略

溪園集十卷

經籍

集

文獻通考卷三百三十九

七

八

陳氏曰蘄春吳億大年撰其父擇仁爲尚書億仕至靜江倅居餘干有溪園佳勝世傳其樓雪初消詞爲建康帥晁謙之作

于湖集四十卷

陳氏曰中書舍人歷陽張孝祥安國撰甲戌冠多士出思陵親擢秦相孫埴遂居其下秦忌惡之以他事下其父子大理獄明年秦亡上旣素眷不五年登法從阜陵尤眷之不幸不得年死時才四十餘上常有不用不盡之嘆其文翰皆超逸天才也

南軒集三十卷

陳氏曰侍講廣漢張拭欽夫撰魏忠獻公浚之長子當孝宗朝以任子不賜第入西掖者韓元吉劉孝躋其入經筵則拭也

王司業集二十卷

陳氏曰國子司業宛丘王逵致君撰建炎初其家避狄泐汴南下逵年十一偶小泊登岸虜適至亟解維不暇顧遂失之在虜十年間閔得歸其父工部尚書俱旣歸入太學登癸未科爲諫官御史歷麾節終於少司成

周平園序略曰公志氣強學問博其文章瞻而不失之泛嚴而不失之拘議論馳騁於數千百載之上而究極利害於四方萬里之遠其爲歌詩慷慨憂時而比興存焉他文闕辨該貫直欲措諸事業所謂援古證今黼黻其辭特餘事耳

浮山集十六卷

陳氏曰左朝請大夫江都仲并彌性撰紹興壬子進士晚丞光祿寺得知蘄州并嘗倅湖籍中有所盼爲作生朝青詞好事傳誦之遂漏露坐謫官其訓詞略曰爾爲瀆侮之詞曾不

知畏天其知畏吾法乎吾鄉前輩能道其事如此

周平園序略曰彌性自少卓犖不群潛心問學力排王氏一偏之說惟六藝孔孟是師筆勢翩翩俊書籍甚古律如王良造父馭駿馬駕車有犇軼絕塵之勢其賡險韻如繭抽絲印印泥愈出愈新送妹長篇孝友慈愛溢於言外殆欲上規風雅其四六叙事雖闕肆而關鍵實密對屬雖切而非駢儷所能拘最後蕪州謝上表以古文就今體自成一家雜著題跋清雅可愛復以餘力出入釋氏游戲歌詞無不過人

小醜集十二卷續集三卷

陳氏曰直秘閣眉山任盡言元受撰元符諫官伯雨之孫紹興從臣申先之子甲科仕為太常寺主簿終于閩憲揚誠齋序謂其詩文孤峭而有風稜雄健而有英骨忠慨而有義氣蓋將與唐之貞元元和本朝之慶曆元祐諸公並轡

而先終非近世陳陳相因累累隨行之作也

拙齋集二十二卷

陳氏曰校書郎候官林之奇少穎撰之奇學於呂氏本中而太史祖謙學於之奇其登第當紹興辛未年已四十未幾即入館方鄉用而得未疾

霜傑集三十卷

陳氏曰德興董穎仲達撰紹興初人從汪彥章徐師川游彥章為作序

妙峯集四十卷

陳氏曰中書舍人福清林適述中撰元符三年甲科苗劉之變在西掖不失節思陵嘉之終龍圖直學士

鄮峯真隱漫錄五十卷

陳氏曰丞相文惠公四明史浩直翁撰

文獻通考卷之三百三十九
終集
論癡符二十卷

陳氏曰御史臨海李庚子長撰論之義銜鬻也市人鬻物於市誇號之曰論此三字本出顏氏家訓以譏無才思而流布醜拙者以名其集云謙也庚乙丑進士以湯鵬舉薦辟入臺家藏書甚富

梯雲集二十五卷

陳氏曰中書舍人資川趙達莊叔撰辛未大魁有氣節四十一歲卒

海陵集三十二卷

陳氏曰同知密院海陵周麟之茂賧撰乙丑進士戊辰詞科既執政被命使虜亮辭行得罪去

胡獻簡詞垣章四卷

陳氏曰禮部尚書會稽胡沂周伯撰

介庵集十卷

陳氏曰左司郎官趙彥端德莊撰乾淳間名士也嘗宰餘干趙忠定其邑人初冠多士德莊在朝往謁謝德莊語之曰謹勿以一魁先置胷中可謂名言

文獻通考卷之二百三十九終

文獻通考卷之二百四十九

宋鄱陽 馬 端臨 貴與 著
明蘄陽 馮 天馭 應房 校刊

石湖集一百三十六卷

陳氏曰參政吳郡范成大至能撰初以起居郎使虜附奏受書事抗虜於其殿陛間歸時益被上眷以至柄用石湖在太湖之濱姑蘇臺之下去城十餘里面湖為堂號鏡天閣又一堂扁石湖二字阜陵宸翰也今日就荒毀更數年恐無復遺跡矣一再過之為之慨然
誠齋序其集曰公訓詁具西漢之爾雅賦篇有杜牧之之刻深騷辭得楚人之幽遠序山水則柳子厚序任俠則太史遷至於大篇決流短章斂芒縉而不釀縮而不儻清新嫵媚奄

有鮑謝奔逸雋偉窮追太白求其隻字之陳陳一唱之嗚嗚而不可得也今四海內詩人不過三四而公皆過之無不及者予於詩豈敢以千里畏人者而於公獨歛衽焉

周益恭集二百卷年譜一卷附錄一卷

陳氏曰丞相益文忠公廬陵周必大子充撰一字弘道其家既刊六一集故此集編次一切視其凡目其間有奉詔錄親征錄龍飛錄思陵錄凡十一卷以其多及時事托言未刊人莫之見鄭子敬守吉募工人印得之余在莆田借錄為全書然漫其數十處益公自號平園叟

後村劉氏曰平園晚作益自磨礪然散語終是洗滌詞科氣習不盡惟所撰林艾軒誌銘極簡嚴有古意

渭南集三十卷劔南集並續集八十七卷

陳氏曰華文閣待制山陰陸游務觀撰左丞相之孫紹興末

召對賜出身隆興初為密院編修官鄉用矣坐漏泄省中語阜陵以為反覆斥遠之後以夔倅入蜀益自放肆不護細行自號放翁在蜀九年乃歸晚由嚴陵召為南宮舍人將內禪周益恭薦其直北門上終不用及韓氏用事游既挂冠久矣有幼子澤不逮為侂冑作南園記逢大為遂以次對再致仕嘉定庚午年八十六而終游才甚高幼為曾吉父所賞識詩為中興之冠他文亦佳而詩最富至萬餘篇古今未有故文與詩別行渭南者封渭南縣伯

復齋制表二卷

陳氏曰刑部侍郎王柁憲叟撰初寮安中之孫紹興乾道間名士也陸放翁與之厚善

盤洲集八十卷

陳氏曰丞相文惠公鄱陽洪适景伯撰忠宣之長子方奉使

時文惠甫十三歲後與其弟遵同中壬戌宏博科本名造後改焉又三年乙丑弟邁繼之世號三洪其自淮東總領入為太常少卿一年而入右府又半年而拜相然在位僅三閱月為林安宅所攻而去嘗一帥越閑居十六年而終

小隱集七十卷

陳氏曰樞密文安公洪遵景嚴撰其進用最先於兄弟而得年不永薨於淳熙元年

野處類藁二卷

陳氏曰翰林學士文敏公洪邁景盧撰其全集未見

誠齋集一百三十三卷

陳氏曰寶謨閣學士文節公廬陵楊萬里廷秀撰當淳熙末為大逢論思陵配享不合去及韓侂胄用事召之卒不至自次對遷至學士聞開禧出師不食而死自作江湖集序曰予

少作有詩千餘篇至紹興壬午皆焚之大槩江西體也今所存曰江湖集者蓋學后山及半山及唐人者也

荆溪集序予之詩始學江西諸君子既又學后山五字律既又學半山老人七字絕句晚乃學絕句於唐人學之愈方作之愈寡嘗與林謙之屢歎之謙之云擇之之精得之之艱又欲作之之不寡乎之官荆溪嘗以告曰作詩忽若有寤於是辭謝唐人及王陳江西諸君子皆不敢學而後欣如也

南海集序予好為詩初好之既而厭之紹興壬午予詩始變予乃喜既而又厭之至乾道庚寅詩又變淳熙丁酉詩又變時假守毗陵友人尤延之云予詩每變每進今老矣未知能變否能變矣未知能進否

程文簡集二十卷

陳氏曰吏部尚書新安程大昌泰之撰每卷分上下其實四

十卷也博學長於考究著述甚多皆傳於世

推隱集十五卷

陳氏曰信安毛旣平仲撰禮部尚書友之子負才傲世仕止州倅與尤遂初厚善臨終以書別之囑以志墓延之既為銘又序其集

梁溪集五十卷

陳氏曰禮部尚書錫山尤袤延之撰家有遂初堂藏書為近世冠

鄭景望集三十卷

陳氏曰宗正少卿永嘉鄭伯能景望撰

歸愚翁集二十六卷

陳氏曰秀州判官鄭伯英景元撰近世永嘉學者推二鄭伯無紹興乙丑進士自隆興初為館職王府東宮官至少司成正卿用矣每小不合輒乞去卒於建寧守伯英癸未甲科

第四人以親養三十年不調竟不出二人皆豪傑之士也
水心葉氏序曰余嘗讀章蔡氏擅事秦檜終成之更五十六年閉塞經史滅絕理義天下以佞諛鄙淺成俗豈惟聖賢之常道隱民彝并喪矣於斯時也士能以古人源流前輩出處終始執守慨然力行為後生表率非瓌傑特起者乎吾永嘉二鄭公是已蓋長曰伯能字景望季曰伯英字景元大鄭公恂恂少而德成經為人師深厚悃幅無一指不本於仁義無一言而不關於廊廟而景元後健果決論事情發思得其志則必欲盡洗紹聖以來弊政復還祖宗之舊非隨時默默苟為祿仕者也景望徇道寂寞視退如進官至宗正少卿而止初景元中進士第第四人少卿喜而笑曰予一日先我矣然既任秀州判官遂以親辭終其身二十餘年不復仕朝廷亦卒不徵用何者諸公貴人知其才大氣剛中心畏之方以其自

重不浪出無能害已為幸而不暇以廢格科目摧折名士為已責故也豈不悲哉自二鄭公後儒蒙接踵而未嘉與為多然皆兄事景元方其家居得朋友通者有無並坐接席不知歲月遷改自謂如華胥至樂故其講習見聞尤精而片辭半簡必獨出肺腑不規倣眾作也夫孔雀鸞鳳矜其華采顧景自耀為世珍惜是既然矣若夫蛟龍之興雲雨則雷電肯至靈靈百里豈區區然露小技銜細巧而足哉余懼覽者未察因次其本末如左

晦庵集一百卷紫陽年譜三卷

陳氏曰侍講文公新安朱熹元晦撰年譜李方子公晦所述其門人也

勉齋黃氏曰周程張邵之書所以繼孔孟道統之傳歷時未久微言大義鬱鬱而不章為之裒集發顯而後得以盛行於世

太極先天圖精微廣博不可涯涘為之解剝條畫而後天地本原聖賢蘊奧不至於泯沒程張門人祖述其學所得有淺深所見有疏密先生既為之區別以悉取其所長至或識見小偏流於異端者亦必研窮剖析而不沒其所短南軒張公東萊呂公同出其時先生以其志同道合樂與之友至或見識少異亦必講磨辨難以一其歸至若求道而過者竊傳註誦習之煩以為不立文字可以識心見性不假脩為可以造道入德守虛靈之識而昧天理之真借儒者之言以文佛老之說學者利其簡便詆訾聖賢捨棄經典猖狂叫呼側僻固陋自以為悟立論愈下者則又崇獎漢唐比附三代以使其計功謀利之私二說並立高者陷於空無下者溺於卑陋其害豈淺淺哉先生力排之俾不至亂吾道以惑天下於是學者靡然向之先生教人以大學論孟中庸為入道之序而後

經籍 卷之四
及諸經以爲不先乎大學則無以提綱挈領而盡語孟之精
微不參之以論孟則無以融會貫通而極中庸之旨趣然不
會其極於中庸則又何以建立大本經綸大經而讀天下之
書論天下之事哉其於讀書也又必使之辨其音釋正其章
句玩其辭求其義研精覃思以究其所難知平心易氣以聽
其所自得然爲已務實辨別義利毋自欺其謹獨之戒未嘗
不三致意焉蓋亦欲學者窮理反身而持之以敬也從游之
士迭誦所習以質其疑意有未諭則委曲告之而未嘗倦問
有未切則反復戒之而未嘗隱務學篤則喜見於言進道難
則憂形於色講論經典商略古今率至夜半雖疾病支離至
諸生問辯則脫然沉痾之去體一日不講學則惕然常以爲
憂撫衣而來遠自川蜀文詞之傳流及海外至於夷虜亦知
慕其道竊問其起居窮鄉晚出家畜其書私淑諸人者不可

勝數先生既沒學者傳其書信其道者益衆亦足以見理我
之感於人者深矣繼往聖將微之緒啓前賢未發之機辯諸
儒之得失闢異端之訛繆明天理正人心事業之大又孰有
加於此者至若天文地志律曆兵機亦皆洞究淵微文詞字
畫騷人才士疲精竭神嘗病其難至先生未嘗用意而亦皆
動中規繩可爲世法是非妄稟之異學行之篤安能事事物
物各當其理各造其極哉學修而道立德成而行尊見之事
業者又如此秦漢以來迂儒曲學既皆不足以望其藩牆而
近代諸儒有志乎孔孟周程之學者亦豈能以造其閫域哉
嗚呼是迨天所以相斯文焉篤篤生哲人以大斯道之傳也

習庵集十二卷

陳氏曰戶部侍郎曾逮仲躬撰文清公幾之子

東萊呂太史集十五卷別集十六卷外集五卷附錄三卷

陳氏曰著作郎東萊呂祖謙伯恭撰其弟祖儉編錄凡家範尺牘之類編之別集策問宏詞程文之類總之外集年譜遺事則見附錄太史曾文清外孫隆興癸未鎖廳甲科宏詞亦入等仕未達得末疾奉祠年才四十五卒於淳熙辛丑平生著述皆略舉端緒末有成書者學者惜之

大愚叟集十一卷

陳氏曰太府寺丞呂祖儉子約撰祖謙弟也慶元初上封事論救祭酒李祥謫高安以沒寓居大愚寺故以名集

千巖擇藁七卷外編三卷續編四卷

陳氏曰知峽州三山蕭德藻東夫撰嘗宰烏程後遂家焉楊誠齋序其集曰近世詩人若范石湖之清新尤梁溪之平淡陸放翁之敷腴蕭千巖之工致皆余所畏也

齊溪老人遺藁一卷

陳氏曰通判明州濟源李迎彥將撰永嘉周浮沚先生之贊與先大父為襟袂集中有送先君子赴戊子秋試詩首句籍甚人言易已東蓋先君治易故也集序周益公作

沂庵集四十卷

陳氏曰新津任淵子淵撰紹興乙丑類試第一人仕至潼川憲嘗註山谷后山詩行於世新津有天社山故稱天社任淵方舟集五十卷後集二十卷

陳氏曰資陽李石知幾撰石有盛名於蜀少嘗客蘇符尚書家紹興末為學官乾道中為郎歷磨節皆以論罷趙丞相雄其鄉人也素不善石石以是晚益困其自序云宋黽魯倉今猶古也

歸愚集二十卷

陳氏曰吏部侍郎葛立方常之撰勝仲之子丞相邨之父也

以郎官攝西掖忤秦相得罪更化召用言者又以爲附會沈
該罷去遂不復起

綺川集十五卷

陳氏曰太常寺主簿歸安倪偁文舉撰紹興八年進士齊齋
之父

象山集二十八卷外集四卷

陳氏曰知荆門軍金谿陸九淵子靜撰與其兄九齡子壽乾
淳間名士也象山貴溪結茅其上與士友講學山形如象故
名

朱子答項平父書曰大抵子思以來教人之法惟以尊德性
道問學爲用力之要今子靜所說專是尊德性而熹平日所
論却是問學上多了所以爲彼學者多持守可觀而看得義
理全不予細又別說一種杜撰道理遮蓋不肯放下而熹自

覺雖於義理上不取亂說却於取要爲已爲人者多不得力
今當返身用力去短集長庶不墮一偏耳

又答孫敬甫書曰陸氏之學在近年一種浮淺頗僻議論中
固自卓然非其儔匹其徒博習亦有能脩其身能治其家以
施之政事之間者但其宗旨本自禪學中來不可揜諱當時
若只如晁文元陳忠肅諸人分明招認著實受用亦自有得
力處不必如此隱諱遮藏改名換姓欲以欺人而人不可欺
徒以自欺而自陷於不誠之域也然在吾輩須知其如此而
勿爲所惑若於吾學果有所見則彼之言釘釘膠粘一切假
合處自然解拆破散收拾不來矣切勿與辨以啓其紛拏不
遜之論而反爲下莊子所乘也少時喜讀禪學文字見呆老
與張侍郎書云左右旣得此欄柄入手便可改頭換面却用
儒家言語說向士夫接引後來學者其意大略如此不能盡

記其語後見張公經解文字一用此策但其遮藏不密線索
漏處多故讀者一見便知其所自來難以純自託於儒者若
近年則其爲述益精爲說浸巧拋閃出没頃刻萬變而幾不
可辯矣然自明者觀之亦見其徒爾自勞而卒不足以欺人
也但果老之書近見藏中印本却無此語疑是其徒已知此
陋而陰削去之近得江西一後生書有兩語云曠目扼腕而
指本心奮髯切齒而談端緒此亦其中其鄉學之病也
潔齋袁氏集序曰先生自始知學講求大道不得弗措久而
浸明又久而大明此心此理貫通融會美在其中不勞外索
揭諸當世曰學問之要得其本心而已心之本真未嘗不善
有不善者非其初然也孟子嘗言之矣向爲身死而不受今
爲宮室之美妻妾之奉所識窮乏得我而爲之此亦謂失其
本心其言昭晰如是而學者不能深信謂道爲隱而不知其

著謂道爲邈而不知其近求之愈過道愈湮鬱至先生始大
發之如指迷塗如藥久病迷者悟病者愈不越於日用之間
而本心在是矣學者親承師訓向也跂望聖賢若千萬里之
隔乃今知與我同本培之溉之皆足以敷榮茂遂豈不深可
慶哉嗚呼先生之惠後學弘矣先生之言率由中出上而啓
沃君心下而切磨同志又下而開曉黎庶及其他雜然著述
皆此心也儒釋之所以分義利之所由別剖析至精如辨白
黑遏俗學之橫流援天下於旣溺吾道之統盟不在茲乎

林文軒集二十卷

工部侍郎林光朝撰後村劉氏序略曰以言語文字行世非
先生意也先生乾淳間大儒國大師之朱文公於當世之學
間有異同惟於先生加敬然先生學力旣深下筆簡嚴高處
逼檀弓穀梁平處猶與韓並驅在時片簡隻字人已貴重今

其存者如响嘯之碑岐陽之鼓矣先生歿六十年微言散軼復齋陳公某所序者僅十之二三外孫方之泰討求哀拾彙為二十卷勤於李漢趙德矣

施正憲集六十七卷外集三卷

陳氏曰知樞密院廣信施師點聖與撰其在政府六年上眷未衰慨然勇退引去不可回識者壯其決趙南塘汝談其壻也為序其集而傳之

適齋類藁八卷

陳氏曰奉新袁去華宣卿撰紹興乙丑進士改官知石首縣而卒善為歌詞嘗賦長沙定王臺見稱於張安國為書之

梅溪集三十二卷續集五卷

陳氏曰詹事樂清王十朋龜齡撰丁丑大魁立朝剛正劉珙作序劉氏集序略曰公始以諸生對策廷中一日數萬言被

過太上皇帝親擢冠多士取其言行之及佐諸侯入冊府事今上於初潛又皆以忠言直節有所裨補上亦雅敬信之登極之初即召以為侍御史納用其說公知上意以必復土疆必雪讎耻為已任其所言者莫非修德行政任賢討軍之實而於分別邪正之際尤致意焉平居無所嗜好顧喜為詩渾厚質直懇惻條暢如其為人不可為浮靡之文論事取極已意然其規模宏闊骨骼開張出入變化俊偉神速世之盡力於文字者徃徃及不能及其他片言半簡雖或出於脫口肆筆之餘亦無不以仁義忠孝為歸而皆出於肺腑之誠然非有所勉強慕劬而為之也蓋其所稟於天者純乎陽德剛明之氣是以其心光明正大舒暢洞達無所隱蔽而見於事業文章一皆如此海內有志之士聞其名誦其言觀其行而得其心無不欽衽心服至於小人雖以一時趨向之殊或敢巧為謗

詆然其極口不過以為迂闊近名不切時務至其大節之偉
然者則不能有以毫髮點污也

酒隱集三卷

陳氏曰宣州司理趙育去病撰其父鼎臣承之號竹隱畸士
者也

四六類彙三十卷

陳氏曰起居郎建安熊克子復撰皆四六應用之文也亦無
過人者克以王丞相季海薦驟用王時在樞府趙溫叔當國
莫知其所從來頗疑其由徑沮之上意向之不能回也

拙庵雜著三十卷外集四卷

陳氏曰工部侍郎東平趙礪老渭師撰門下侍郎野之姪以
婦翁歐陽棣得制澤入仕從范石湖使虜虞丞相并父亦薦
之遂擢用知臨安坐殿司招兵事謫饒州

雙溪集二十卷

陳氏曰知郴州東陽曹冠宗臣撰由舍選登甲科坐為秦墳
假手奪官再赴廷試得初品

止齋集五十卷

陳氏曰中書舍人永嘉陳傅良君舉撰三山本五十卷

水心葉氏墓誌曰初講城南茶院時諸老先生傳科舉舊學
摩蕩鼓舞受教者無異辭公未三十心思挺出陳編宿說披
剝潰敗奇意芽甲新語懋長士蘇醒起立駭未曾有皆相號
召雷動從之雖縻他師亦藉名陳氏由是其文擅於當世公
不自喜悉謝去獨崇敬鄭景望薛士龍師友尊之入太學則
張欽夫呂伯恭相視遇兄弟也公之從鄭薛也以克已兢畏
為主敬德集義於張公盡心焉至古人經制三代治法又與
薛公反復論之而呂公為言本朝文獻相承所以垂世立國

者然後學之内外本末備矣公猶不已年經月緯晝驗夜索詢世舊繙吏牘蒐斷簡採異聞一事一物必稽於極而後止千載之上珠貫而絃組之若自見其身相旋其間吕公以為其長不獨在文字也

文獻通考卷之二百四十一

文獻通考卷之二百四十一

宋鄱陽 馬端臨 貴與 著
明蘄陽 馮天馭 應房 校刊

經籍考 集

水心集二十八卷拾遺一卷別集十六卷

陳氏曰吏部侍郎永嘉葉適正則撰淮東本無拾遺編次亦不同外集者前九卷為制科進卷後六卷號外藁皆論時事末卷號後總專論賈田贍兵

丘文定集十卷拾遺一卷

陳氏曰樞密江陰丘宗卿撰隆興癸未進士第三人其文慷慨有氣而以吏能顯故其文不章

趙忠定集十五卷奏議十五卷

陳氏曰丞相福公趙汝愚子直撰別本總為一集亦三十卷

鴈湖李氏書後丞相餘干趙公秉正履度即之凜然至形於
篇章則思致清麗發逸雖古今能文辭者有不逮而世顧鮮
知者非繇德業之巨器能之偉所以詞華見沒邪

龍川集四十卷外集四卷

陳氏曰永康陳亮全父撰少入太學嘗三上孝廟書召詣政
事堂宰相無弘度迄報罷後以晚舉爲癸丑進士第一未祿
而卒所上書論本朝治體本末源流一時諸賢未之及也亮
才甚高而學駁其與采晦庵往返書所謂金銀銅鉄混爲一
器者可見矣平生不能詩外集皆長短句極不工而自負以
爲經綸之意具在是尤不可曉也葉正則未遇時亮獨先識
之後爲集序及跋皆含譏誚識者以爲議

水心葉氏集序曰同甫文字行於世者酌古論陳子課藁上
皇帝三書最著者也子沆聚他作爲若干卷以授予初天子

得同甫所上書驚異累日以爲絕出使執政召問當從何處
下手將由布衣徑唯諾殿上以定大事何其盛也然而詆訕
交起竟用空言羅織成罪再入大理獄幾死又何酷也使同
甫晚不登進士第則世終以爲狼疾人矣嗚呼悲夫同甫其
果有罪於世乎天平余知其無罪也同甫其果無罪於世乎
世之好惡未有不以情者彼於同甫何獨異哉雖然同甫爲
德不爲怨自厚而薄責人則疑若以爲有罪焉可矣同甫旣
修皇帝王霸之學上下二千餘年考其合散發其祕藏見聖
賢之精微常流行於事物儒者失其指故不足以開物成務
其說皆今人所未講朱公元晦意有不與而不能奪也呂公
伯恭退居金華同甫間往視之極論至夜呂公嘆曰未可以
世爲不能用虎帥以聽誰敢犯子同甫亦頗慰意焉余最鄙
且鈍同甫微言十不能解一二獨以爲可教者病眊十年耗

忘盡矣今其遺文大抵班班具焉覽者詳之而已

軒山集十卷

陳氏曰樞密使獻肅公濡湏王蘭謙仲撰淳熙乙未駕幸太學蘭為武學論在班列中人物備然上一見奇之自是擢用不由邑最徑為察官馴至執政其在經帷論官僚攀附而登輔佐者挾數用術道諛濟私陳義凜然嘉定以來其子孫不敢求仕亦不敢請謚至端平乃得謚

合齋集十六卷

陳氏曰祕書少監永嘉王柎叔撰乾道丙戌進士在永嘉諸老最為先登其容貌偉然襟韻灑然雖不以文自鳴而諸老皆推敬之

兼山集四十卷

陳氏曰端明殿學士劍門黃裳文叔撰在嘉邸最久備盡忠

益甲寅御極未及大用病不能朝士論惜之
攻愧集一百二十卷

陳氏曰參政四明樓鑰大防撰隆興癸未省試考作賦魁以犯諱當黜知舉洪文安遵奉收宣末甲首

西山真氏集序曰公之文如三辰五星森麗天漢昭昭乎其可觀而不可窮如泰華喬嶽蓄泄雲雨巖巖乎莫測其顛際如九江百川波瀾蕩潏淵淵乎不見其涯淡人徒見其英華發外之盛而不知其本有在也公生於故家接中朝文獻博極群書識古文奇字文備衆體非他人窘狹僻澁以一長名家而又發之以忠孝本之以仁義其大典冊大議論則世道之消長學術之廢興善類之離合係焉方淳紹間鴻碩滿朝每一奏篇出其援據該洽義理條達者一詔令下其詞氣雄渾筆力雅健者學士大夫讀之必曰樓公之文也於乎所謂

有本者如是非邪

齊齋甲藁二十卷乙藁十五卷翰林前藁二十卷後藁二卷掖

垣詞草二十卷兼山論著三十卷附錄五卷年譜一卷

陳氏曰禮部尚書歸安倪思正父撰丙戌進士戊戌宏詞受

知阜陵早登禁直紹熙間遂位法從立朝剛介不苟合慶元

嘉定屢召屢出嘗言與其為有暇執政寧為無暇從官由是

名重天下端平初詔以先朝遺直得謚文節

靜安作具十四卷別集十卷

陳氏曰清江徐得之思叔撰與其子筠孟堅同甲辰進士次

子天麟仲祥亦乙丑甲科其家長於史學

晦巖集十二卷

陳氏曰祕書丞監官沈清臣正卿撰嘗為國子錄有薦於朝

欲得召試執政有發笑者曰安有張子蓋女審而可為館職

者乎遂罷欲為奇節以蓋之會王希呂為諫官上書力言其

不可孝宗大怒時相虞允文惡沈介下清臣大理風使引介

不從謫封州晚乃召用勸孝宗力行三年喪為翊善嘉邸以

直諒稱初從張無垢學後居雲川自嶺南歸開門受徒動以

聖賢自命效禪門入室規式與其徒問答下語不契輒使非

參頗為人所譏

定齋集四十卷

陳氏曰寶謨閣直學士蔡戡定夫撰君謨四世孫丙戌甲科

小山雜著八卷

陳氏曰知樞密院龍泉何澹自然撰

東江集十卷

陳氏曰丞相臨海謝深甫子肅撰

慈溪甲藁二十卷

陳氏曰寶謨閣直學士慈溪楊簡敬仲撰

鈍齋集六十卷

陳氏曰著作郎楊濟濟道撰淳熙五年進士京鐸帥蜀上巴出遨濟為樂語首云三月三日豈無水邊麗人一觴一詠亦有山陰禊事又云良辰美景賞心樂事四者難并崇山峻嶺脩竹茂林群賢畢至一時傳誦京為相召入館權郎出知果州以終

周氏山房集二十卷後集二十卷

陳氏曰秘書省正字吳郡周南南仲撰南有聲學校庚戌登甲科而仕不偶再入館再罷以殿廷所授文林郎終焉水心葉氏墓誌曰君耽書喜誦出於天性十五六時視吳下問學止科舉心陋之一往旬日已弃去歲五易師一易師為傾動相播告擯絕既從余初若無所論質已而耳改目化氣

疎神涌古今事物錯落其下不以涯量頓悟捷得受之若驚行之若疑標樹山嶽之上越軼風霆之外故朋昔類望塵不及皆靡弛而逝矣常以世道興廢為己重負一飯不顧私憂時如家憂人如身人情多玩忽見事君悻心恒慮觀緩知亟老校小史引坐深語所知往往非人所能知也文詞撥去今作脫換騷雅欲以力自成家而瓌麗精切達於時用亦非人所及也端行拱立尺寸程準門內順穆廉節整飭自賜築授文林郎終身不進官兩為館職數月止既絕意屏坐衣食弊惡雞鳴挾書晝夜分皆憶念上口數千載未了事皆欲正定名童偉着皆欲銓品異聞逸傳皆欲論述曰此所以遺吾老俟吾死也

平庵悔藁十五卷後編六卷

陳氏曰太府卿松陽項安世平父撰悔藁者以語言得罪悔

不復為也自序當慶元丙辰後編自丁巳至壬戌

自序項子題所為文藁曰滑稽篇客曰是所謂文似相如始類俳之意非邪曰非也世之人無貴賤皆畏人笑獨滑稽者不畏人笑非獨不畏且甚欲之凡其貌服言動皆欲得人之笑人小笑之則小愜大笑之則大愜人不笑之則大愧若予之為文亦若是耳人之笑予之藥也人小笑之則予亡其小病矣人大笑之則予亡其大病矣人不笑之則予之病其危哉是與滑稽之技無以異也客聞其說觀其文大笑冠帶盡脫項子赧然汗下矍然神醒曰予病瘳矣再拜謝客書以為序

東平集二十七卷

陳氏曰鞏豐仲至撰淳熙甲辰進士

水心墓誌略曰時新迪義理之學草茅士震於見聞多矜露

休慙至他文史言論儒之藝業又昧陋顛倒莫知幅程獨仲至抑縱開闢條流品彙應變不迫富若素有余本拙踈不能自達而仲至廣導曲引出幽入眇蓋為之黽勉追逐於荒原斷澗之側數年仲至日益有名不幸不得用然有以自負命雲侶月跨越汗漫浩乎不可免而余畏懼怯劣常痼留一榻不敢越戶限然後知人之稟分高下絕殊固非切磋掖所能增長矣仲至學敏而早成自童壯時前輩源緒古今音節事之因革總統如注水千丈之壑迫前隨後宿艾駭服以為積數十年燈火勤力聚數十家師友講明猶不能到也其文無險恠華巧而以理屈人片詞半牘皆清朗得言外趣尤工為詩多至三千餘首

三松集十八卷

陳氏曰廬陵王子俊才臣撰周益公楊誠齋客以列薦補官

入蜀爲成都帥幕

橫堂小集十卷

陳氏曰右司郎中福青林桶子長撰

潔齋集二十六卷後集十二卷

陳氏曰禮部侍郎四明袁燮和叔撰

北山集略十卷

陳氏曰直龍圖閣三山陳孔碩庸仲撰全集未傳

育德堂外制集八卷內制集三卷

陳氏曰兵部尚書永嘉蔡幼學行之撰成童穎異從同郡陳傳良君舉學治春秋年十七試補上庠首選陳友出其下明年陳改用賦冠監舉而幼學經魁又明年省闈先多士而陳傳良亦爲賦魁一時師弟子雄視場屋莫不歆羨

水心葉氏墓誌曰公雖幼以文顯無浮巧輕艷之作旣長益

務闡教化養性情花卉之炫麗風露之凄爽不道也詞命最
溫厚亦不自矜貴惟於國史研貫專一朱墨義類刊閏齊整
各就書法爲續司馬公卿百官表年曆大事記備志辨疑編
年政要列傳舉要等百餘篇今代之完書也天資疑重危坐
竟日或不通一詞龍窟陳同甫言吾嘗與陳君舉極論往往
擊枵案聲撼林木行之在旁邈若無聞吾頗訥之衆亦云素
無短長於間也一日夜盡散忽語吾道一爾奚皇帝王霸之
云吾方辨數而行之橫啓縱闔援今證古釐爲十百聚爲一
二抵夜接日若懸江河吾謝不能乃已則復寡言默默如故
故雖並舍連榻不知也然則昔人謂得人眉睫定士於俄頃
亦豈盡然歟蓋公之中深隱厚可驗於是矣

止安集十八卷

陳氏曰太府寺丞三山陳振震亨撰

西山集五十六卷

陳氏曰參政浦城真德秀希元撰

平齋集三十二卷

陳氏曰翰林學士於潛洪咨夔舜俞撰

退庵集十五卷

陳氏曰提轄文思院龍泉陳炳撰

梅軒集十二卷

陳氏曰奉化丞山陰諸葛興仁叟撰

遁思遺藁六卷事監韻語三卷

陳氏曰永康呂皓子陽撰遁思其庵名後溪劉光祖德修為

作記當淳熙中投匭救父兄之難朝奏上夕報可一時非辜

盡得清脫其書辭甚偉然非孝廟聖明安能照覆盆之下哉

劉汝一進卷十卷

陳氏曰諫議大夫吳興劉度汝一撰度嘗應大科此其所業

也策曰傳言論曰鑑古各二十五篇

唯室兩漢論一卷

陳氏曰吳郡陳長方齊之撰紹興八年進士

鼎論三卷時議一卷

陳氏曰三山何萬一之撰隆興元年進士仕為都司知漳州

治述十卷

陳氏曰從政郎鄭湜紹熙元年撰進按丙戌榜有三山鄭湜

溥之是年已為秘書郎面對劄子剴切通練于今傳誦此當

別是一鄭湜邪

廬山雜著一卷

陳氏曰知南康軍錢聞詩撰

閑靜治本論五卷將論五卷

閑靜治本論五卷將論五卷

陳氏曰知樞密院廣陵張巖省翁撰

林綱山集

福清林亦之學可撰後村劉氏序略曰余嘗評艾軒高處逼檀弓穀梁平處猶與韓並驅他人極力摹擬不見其峻潔而古奧者惟見其寂寥而稀短者縱使逼真或可亂真猶虎賁之似蔡邕也至於綱山論著句句字字足以明周公之志得少林之髓矣其律詩高妙者絕類唐人疑老師當避其鋒他文稱是

陳樂軒集

福清陳藻元潔撰後村劉氏序略曰樂軒七十五乃死年出於其師而窮尤甚於其師城中無片瓦僑居福清縣之橫塘開門授徒不足自給至浮游江湖崎嶇嶺海積鏹得百千歸買田數畝輒爲人奪去士之窮無過於此爰今讀其文講學

明理浩乎自得不及汲於希世求合螢牕雪案猶宗廟百官也菜羹脫粟猶堂食萬錢也入則課妻子耕織勤生務本有拾穗之歌焉出則與諸生弦誦登山臨水有舞雩之詠焉自昔遺佚阨窮之士功名頓挫時命齟齬往往有感時觸事之作以洩其無慘不平之鳴若虞卿之愁韓非之憤墨翟之悲梁鴻之噫唐衢之哭是已樂軒平生可愁可憤可悲可噫可哭之時多矣而以樂自扁樂之爲義在孔門惟許顏子先儒教人必令求顏氏之所樂嗚呼此固樂軒之所聞於二師歟樂軒沒二十餘年余從竹溪林侯肅翁傳抄遺藁姑敘其平生大致如此肅翁又樂軒之高弟也他日居魏文貞之地秉陳叔達之筆當爲河汾先生立傳無使天下後世有遺恨云

李易安集十二卷

晁氏曰李格非之女幼有才藻名先嫁趙誠之其舅正夫相

徽宗朝李氏嘗獻詩曰炙手可熱心可寒然無檢操後適張汝舟不終晚節流落江湖間以卒

閨秀集二卷

陳氏曰建安徐氏撰徐林禪山之從姑祥符勅頭頤之姪孫女嫁括蒼祝璣璣為部使者有子曰承之嘗知滁州

洪覺範筠溪集十卷

晁氏曰僧惠洪覺範姓喻氏高安人少孤能緝文張天覺聞其名請住峽州天寧寺以為今世融肇也未幾坐累民之及天覺當國復度為僧易名德洪數延入府中及天覺去位制獄窮治其傳達言語於郭大信竄海南島上後北歸建炎中卒著書數萬言如林間錄僧寶傳次齋夜話之類皆行於世然多夸誕人莫之信云

釋門文宗禪二十卷

陳氏曰洪覺範撰其在釋門得法於真淨克文而於士大夫則與黨人皆厚善誦習其文得罪不悔為張商英陳瓘鄒浩尤盡力其文俊偉不類浮屠語韓駒子蒼為塔銘云爾

饒德操集一卷

晁氏曰饒節字德操曾布之客也性剛峻晚與布論不合因棄去祝髮為浮屠在襄漢間聲望甚重云

陳氏曰節為僧號如璧其詩名倚松集二卷

文獻通考卷之二百四十一

文獻通考卷之二百四十一

文獻通考卷之二百四十二

宋鄱陽馬端臨貴與著

明蘄陽馮天馭應房校刊

經籍考集詩集

陳氏曰凡無他文而獨有詩及雖有他文而詩集復獨行者別為一類

阮部兵集

陳氏曰魏步兵校尉陳留阮籍嗣宗撰其題皆曰詠懷首卷四言十三篇餘皆五言八十篇通為九十三篇文選所收十七篇而已

宋武帝集一卷 陳氏曰孝武駿也

梁簡文集五卷

陳氏曰簡文帝網也按隋志八十五卷唐已缺五卷中興書

經籍考

箱

目只存一卷詩百篇又缺其三首今五卷皆詩總為二百四十四篇

梁元帝詩一卷

陳氏曰即湘東王繹

謝惠連集一卷

陳氏曰宋司徒參軍謝惠連撰本集五卷今惟詩二十四首惠連得名早輕薄多尤累故仕不顯死時才三十七歲

劉孝綽集一卷

陳氏曰梁祕書監彭城劉孝綽撰宋僕射勳之孫本傳稱文集數十萬言今所存止此又言兄弟及群從子弟當時有七十人並能屬文近古未有其三妹亦並有才學適徐悱者文尤清拔以謂劉三娘者今玉臺集中有悱妻詩

柳吳興集一卷

陳氏曰梁吳興太守河東柳惲文暢撰僅有十八首

徐孝穆集一卷

陳氏曰陳太子太傅東海徐陵孝穆撰本傳稱其文喪亂散失存者二十卷今惟詩五十餘篇

江總集一卷

陳氏曰陳尚書公考城江總總持撰總在陳為太子詹事以宮端為長夜之飲及後主即位當權任日為艷詩君臣昏亂以至亡國入隋為上開府唐志集三十卷中興書目七卷今惟存詩僅百首云

陰鏗集一卷

陳氏曰陳散騎常侍南平陰鏗子堅撰才三十餘篇杜子美云李侯有佳句往往似陰鏗今考之未見鏗之所以似太白者太白固未易似也子美云爾殆必有說

薛道衡集一卷

陳氏曰隋內史侍郎河東薛道衡元卿撰詩凡十九篇本集三十卷所存止此大抵隋以前文集存全者亡幾多好事者於類書中抄出以備家數也

史言道衡每至構文必隱空齋踞壁而卧聞戶外人聲便怒其沉思如此

杜必簡集一卷

陳氏曰唐著作郎襄陽杜審言必簡撰工部之祖也唐初沈宋以來律詩始盛行然未以平仄失眼為忌審言詩雖不多句律極嚴無一失粘者甫之家傳有自來矣然遂欲衙官屈宋則不可也

楊誠齋序略曰必簡嘗為吉州司戶今戶曹趙君彥清旁搜遠撫得其詩四十二首將刻棗以傳好詩且以為戶廳之寶

王大弓劉子集之余觀必簡之詩若牽絲紫蔓長即水行牽風翠帶長之句也若鶴子曳童衣即儒衣山鳥惟之句也若雲陰送晚雷即雷聲忽送千峯雨之句也若風光新柳報宴賞落花催即星霜玄鳥變身世白駒催之句也予不知祖孫之相似其有意乎抑亦偶然乎至如往來花不發新舊雪仍殘如日氣抱殘虹如愁思看春不當春明年春色倍還人如飛花攪獨愁皆佳句也三世之後莫之與京宜哉

薛少保集一卷

陳氏曰唐太子少保河東薛稷嗣通撰稷道衡曾孫魏徵外孫

喬知之集一卷

陳氏曰唐右司郎喬知之撰天授中為酷吏所陷死集中有綠珠怨蓋其所由以致禍也

孟襄陽集三卷

陳氏曰唐進士孟浩然撰宣城王士源序之凡二百十八首
分爲七類太常卿韋縉爲之重序

東坡謂浩然詩韻高而才短如造內法酒手而無材料邪

崔顥集一卷

陳氏曰唐司勳員外郎崔顥撰開元十年進士才俊無行黃
鶴樓詩成傳于世

祖詠集一卷

陳氏曰唐祖詠撰開元十二年進士

崔國輔集一卷

陳氏曰唐集賢直學士禮部員外郎崔國輔撰開元十三年
進士確縣令舉爲許昌令天寶中加學士後以王鉞近親坐
貶詩凡二十八首臨海李氏本後又得石林葉氏本多六首

綦母潛集一卷

陳氏曰唐待制集賢院南康綦母潛孝通撰南康今贛州
儲光義作五卷

陳氏曰唐監察御史魯國儲光義撰與崔國輔綦母潛皆同
年進士天寶末任僞官貶死顧況爲集序

常建集一卷

王江寧集一卷

陳氏曰唐龍標尉江寧王昌齡伯才撰與常建俱開元十四
年進士二十二年選宏詞超絕群類爲汜水尉不獲細行貶
龍標世亂還里爲刺史閻丘曉所殺爲詩緒密而思清

李頎集一卷

陳氏曰唐李頎撰開元二十三年進士

文獻通考卷三百四十二
四
晏

崔曙集一卷

陳氏曰唐崔曙撰開元二十六年進士狀頭

杜工部詩集注三十六卷

陳氏曰蜀人郭知達所集九家注世有稱東坡杜詩故事者隨事造文一一牽合而皆不言其所自出且其辭氣首末出一口蓋妄人依托以欺亂流俗者書坊輒勦入集注中殊敗人意此本獨削去之福清曾噩子肅刻板五羊漕司字大宜老最為善本

宋子京贊唐興詩人承陳隋風流浮靡相矜至宋之間沈佺期等研揣聲音浮切不差而號律詩競相沿襲逮開元間稍裁以雅正然恃華者質友好麗者壯遠人得一槩皆自名所長至甫渾涵汪洋千彙萬狀兼古今而有之他人不足甫乃厭餘殘膏賸馥沾丐後人多矣故元稹謂詩人以來未有如

子美者甫又善陳時事律切精深至千言不少衰世號詩史昌黎號愈於文章少許可至歌詩獨推曰李杜文章在光焰萬丈且誠可信云

朱子語錄曰杜詩初年甚精細晚年橫逸不可當只意到處便押一箇韻如自秦州入蜀諸詩分明如畫乃其少作也人多說杜子美夔州詩好此不可曉夔州詩却說得鄭重煩絮不如他中前有一節詩好魯直一時固有所見今人只見魯直說好便却說好如矮人看場耳杜詩最多誤字蔡宗正異固好而未盡其嘗欲廢之作杜詩攷異竟未暇也如風吹蒼江樹雨洒石壁來樹字無意思當作去字無疑去字對來字又如蜀有漏天以其西北陰盛常雨如天之漏也故杜詩云鼓角漏天東後人不曉其義遂改漏字為滿字似此類極多門類杜詩二十五卷

類集詩史三十卷
陳氏曰稱東萊徐宅居仁編次未詳何人

陳氏曰莆陽方醇道溫叟編

王季友集一卷

陳氏曰唐王季友撰元結篋中集有季友詩二首今此集有七篇而篋中二首不在焉杜詩所謂豐城客子王季友者意即其人也耶

陶翰集一卷

陳氏曰唐禮部員外郎丹陽陶翰撰開元十八年進士次年宏詞

秦隱君亦一卷

陳氏曰唐處士秦系公緒撰自天寶間有詩名潘鎮奏辟皆不就嘗隱越之剡泉之南安至貞元中年八十餘不知所終

此本南安所刻余嘗於宋次道寶刻叢章得其逸詩二首書冊末

岑嘉州集八卷

陳氏曰唐嘉州刺史南陽岑參撰文本之曾孫天寶三載進士為補闕左史郎官與杜甫唱和

李嘉祐集一卷

陳氏曰唐台州刺史李嘉祐從一撰天寶七載進士亦號臺閣集李肇稱其水田飛白鷺夏木轉黃鸝之句王維取之以為七言今按此集無之

右謝惠連陰鏗杜審言儲光羲王昌齡常建孟浩然岑參李嘉祐九家集晁氏書錄在別集門所論已附在本門此更不重具

皇甫冉集一卷

皇甫冉集

皇甫冉集

六

晁氏曰唐皇甫冉茂政丹陽人天寶十五年進士為無錫尉
歷拾遺補闕卒與弟曾齊名當時比張氏景陽孟陽云集有
獨孤及序

皇甫曾集一卷

陳氏曰唐侍御史皇甫曾孝常撰天寶十二載進士兄冉後
曾三載登第

郎士元詩一卷

晁氏曰唐郎士元字君胄中山人天寶十五載進士為郢州
刺史與錢起俱有詩名而士元尤更清雅時朝廷公卿出牧
奉使若兩人無詩祖行人以為愧

包何集一卷

陳氏曰唐起居舍人延陵包何幼正撰

包佶集一卷

唐史藝文志何佶皆包融之子兄弟齊名世稱二包融以儲
光義皆延陵人曲阿有餘杭尉丁仙芝緱氏主簿蔡隱立監
察御史蔡希周渭南尉蔡希寂處士張彥惟張湘校書郎張
暈吏部常選周瑀長洲尉談戴句容有王府參軍殷遙破石
主簿樊光橫陽主簿沈如筠江寧有右拾遺孫處玄處士徐
延壽丹徒有江都主簿馬挺武進尉申堂構十八人皆有詩
名殷蟠彙次其詩為丹陽集者

陳氏曰唐祕書監包佶選天寶六載進士兄何後一年

錢考功集二卷

晁氏曰唐錢起徵之父吳郡人天寶中舉進士初從鄉薦客
舍月夜聞人哦於庭曰曲終人不見江上數峯青起攝衣從
之無所見矣及就試詩題乃湘靈鼓瑟也起即以鬼謠十字
為落句主文李暉深嘉之擢至高第釋褐授校書郎終考功

錢考功集

錢考功集

七

士

與郎士元齊名時曰前有沈宋後有錢郎

陳氏曰蜀本作前後集十三卷

韓翃集五卷

晁氏曰唐韓翃君平南陽人天寶十三載進士淄青侯希逸宣武李勉繼辟幕府俄以駕部郎中知制誥終於中書舍人翃詩興致敏富朝野重之

陳氏曰翃以春城飛花之句受知德宗

顧况集二十卷

晁氏曰唐顧况字逋翁蘇州人至德二年江東進士善為歌詩性諧談德宗時柳渾輔政以秘書郎召况善李泌及泌相自謂當得達官久遷著作郎及泌卒有調笑語貶饒州司戶卒集有皇甫湜序

陳氏曰湜嘗言吾自為顧况作序未嘗許他人况在唐蓋為

人推重也集本十五卷今止五卷不全

嚴維集一卷

陳氏曰唐秘書郎山陰嚴維正文撰至德二載辭藻宏麗科

耿湣集一卷

陳氏曰唐右拾遺河東耿湣撰寶應二年進士登科記一作

緯

韋蘇州集十卷

陳氏曰唐韋應物京兆人天寶時為三衛後作洛陽丞京兆府功曹知滁州二州召還或媚其進媒孽之出為蘇州刺史詩律自沈宋以後日益靡曼鏗章刻句揣摩浮切雖音韻諧婉屬對麗密而閑雅平淡之氣不存矣獨應物之詩馳驟建安以還得其風格云韓子蒼曰蘇州少以三衛郎事玄宗蒙縱不羈玄宗崩始折節務讀書故其逢楊開府詩曰少事武

皇帝無賴恃恩私身作里中橫家藏亡命兒朝持擣蒲扇暮
竊東隣姬司隸不敢捕立在白玉墀一字都不識飲酒肆頑
癡云然余觀其人為性高潔鮮食寡欲所居掃地焚香而
坐與豪縱者不類其詩清深妙麗雖唐詩人之盛亦少其比
又豈似晚節把筆學為者豈蘇州自序之過歟

徐師川云韋蘇州詩人多言其古淡乃是不知言自李杜以
後古人詩法盡廢惟蘇州有六朝風致最為流麗

司空文明集三卷

陳氏曰唐虞部郎中京兆司空曙文明撰別本一卷才數篇

李端司馬集三卷

晁氏曰唐李端趙州人大曆五年進士為校書郎卒官杭州
司馬郭曖尚昇平公主賢明招納士類故端等皆客之當坐
上賦詩奇甚主大加稱歎錢起曰素為之請賦起姓端立獻

一篇云新開金埒看調馬舊賜銅山許鑄錢起乃服主喜厚
賜之

盧綸詩一卷

晁氏曰唐盧綸與中孚韓翃錢起司空曙苗發崔炯耿緯夏
侯審李端皆能詩齊名號大曆十才子綸字允言累舉進士
不第

李益詩一卷

晁氏曰唐李益君虞姑臧人大曆四年進士調鄭縣尉幽州
劉濟辟從事憲宗雅聞其名召為集賢殿學士召才凌籍士
衆不能堪暴其獻濟詩不上望京樓之句以涉怨望詔降秩
俄復舊益少負詞藻長於歌詩與宗人賀齊名每作一篇樂
工以賂求取被聲歌供奉天子征人早行詩天下皆施之圖
畫今集有從軍詩五十首而無此詩惜其放逸多矣

陳氏曰益宰相揆之族子舊史本傳指其少有癡疾防閑妻妾過於苛酷有散灰扃戶之談聞於時故時謂之妬癡為李益疾按世傳霍小玉傳所謂李十郎詩開簾風動竹疑是故人來者即益也舊史所載如此豈小玉將死訣絕之言果驗邪抑好事者因其有此疾遂為此說以實之也

孟東野詩集十卷

晁氏曰唐孟郊東野湖州人貞元十二年進士調溧陽尉辟為興元參謀卒郊少隱嵩山性介寡合韓愈一見為忘形交為詩有理致然思苦澁李觀論其詩曰高處在古無上平處下顧二謝云張籍謚為貞曜先生集宋次道重編先時世傳沐吳鏤本五卷一百二十四篇周安惠本十卷三百三十一篇別本五卷三百四十篇蜀人蹇濬用退之贈郊句纂咸池集二卷一百八十篇自餘不為編秩雜錄之家家自異次道

總拾遺逸摘去重複若體製不類者得五百十一篇四十聯句不與尋一贊二書附于後郊集於是始有定書

錄濱蘇氏曰唐人工於為詩而陋於問道孟郊嘗有詩曰食齋賜亦苦強歌聲無歡出門如有礙誰云天地寬郊耿介之士雖天地之大無以安其身起居飲食有感之憂是以卒窮以死而李觀盛稱之至韓退之亦談不容口甚矣唐人之不聞道也孔子稱顏子不在陋巷人不堪其憂回也不改其樂與郊異矣

朱傲詩一卷

晁氏曰唐朱傲字長通襄陽人隱居剡溪嗣曹王臯鎮江西辟節度參謀貞元初召為拾遺不就

朱灣集一卷

陳氏曰唐永平從事朱灣撰自號蒼洲其為從事李勉辟之

也

麴信陵集一卷

晁氏曰唐麴信陵貞元元年進士為舒州望江令以平

長孫佐輔集一卷

陳氏曰唐長孫佐輔撰按百家詩選云德宗時人其父公輔為吉州刺史往依焉當必有所秘也其詩號古調集

柳宗元詩一卷

陳氏曰唐柳宗元撰子厚詩在唐不王摩詰韋應物相上下頗有陶謝以古律絕句總一百四十五篇在全集中不便於觀覽因抄出別行東坡曰蘓李之天成曹劉之自得陶謝之超然固已至矣而杜子美李太白以英偉絕世之資凌跨百代古之詩人盡廢也魏晉以來高以絕廢亦少衰矣李杜詩人之後繼出雖有

遠韻而才不逮意獨韋應物柳子厚發纖穠於簡古寄至味於淡泊非餘子所及也唐末司空圖崎嶇兵亂之間而得詩人高雅獨有承平之遺風其論詩曰梅止於酸鹽止於鹹飲食不可無鹽梅而其美常在於鹹酸之外可以一唱而三嘆也子厚詩在陶淵明下韋蘇州上退之豪放奇險則過之而溫麗清深不及也所貴於枯淡者謂外枯而中膏似淡而實美淵明子厚之流是也若中邊皆枯亦何足道佛言譬如食蜜中邊皆甜人食五味知其甘苦者皆是能分別其中邊者百無一也

後村劉氏曰柳子厚才高他文惟韓可對壘古律詩精妙韓不及也當舉世為元和體韓猶未免諧俗而子厚獨能為一家之言豈非豪傑之士乎昔何文縝嘗語李漢老云如子厚詩人豈可不學他做數百首漢老退而嘆曰得一二首似之

足矣文績後從北狩病中詩云歷歷通前劫依依返舊魂人生會有死遺恨滿乾坤雖意極忠憤而語不刻急亦學柳之

驗

張籍詩集五卷

晁氏曰唐張籍文昌和州人貞元十五年登進士第終國子司業籍性狷急爲詩長於樂府多警句元和中和與白樂天孟東野歌詞天下宗之謂之元和體一本纔三卷

陳氏曰張洎所編錢公輔名木鐸集與他本相出入亦有他本所無者凡十二卷近世湯中季庸以諸本校定爲張司業集八卷且考訂其爲吳郡人魏峻叔高刻之平江續又得木鐸集凡他本所無者皆附其末

王建集十卷

陳氏曰唐陝州司馬王建仲和撰建長於樂府與張籍相上

下大曆十年進士歷官昭應縣丞太和中爲陝州司馬尤長宮詞在集中第十卷錄出別行

漁隱叢話余閱王建宮詞選其佳者亦自少得只世所膾炙者數詞而已其間雜以他人之詞如閑吹玉殿照華管醉折梨園縹帶花十年一夢歸人世絳縷猶封繫臂紗銀燭秋光冷畫屏輕羅小扇撲流螢天階夜色涼如水卧看牽牛織女星並杜牧之也淚滿羅巾夢不成夜深前殿按歌聲紅顏未老恩先斷斜倚薰籠坐到明此白樂天也寶仗平明金殿開暫將紈扇共徘徊玉顏不及寒鷗色猶帶昭陽日影來此王昌齡也建詞凡百有四篇又逸詞九篇或云元微之亦有詞雜於其間余以元氏長慶集檢尋却無之或者之言誤矣舊跋王建大和中爲陝州司馬與韓愈張籍同時而籍相友善工爲樂府歌行思遠格幽初爲渭南尉與宦者王守澄有

宗人之分因過飲相譏戲守澄深憾曰吾弟所作宮詞禁掖
深邃何以知之將奏劾建因以詩解之曰先朝行坐鎮相隨
今上春宮見長時脫下御衣偏得着進來龍馬每教騎嘗承
密旨還家少獨奏邊情出殿遲不是當家頻向說九重爭遣
外人知事遂寢宮詞凡百絕天下傳播傷此體者雖有數家
而建爲之祖也

李長吉集四卷外集一卷

晁氏曰唐李賀長吉鄭王之孫七歲能詞章韓愈皇甫湜聞
之過其家使賦詩援筆輒就自目曰高軒過二人大驚年二
十七終協律郎賀詞尚奇詭爲詩未始先立題所得皆驚邁
遠去筆墨畦逕當時無能仿者樂府十數篇雲韶工合之絃
管云或說賀卒後不相悅者盡取其所著投溷中以故世傳
者不多外集予得之梁子家姚鉉頗選載文粹中

宋景文諸公在館嘗評唐人詩云太白仙才長吉鬼才然長
古有鴈門太守詩曰黑雲壓城城欲摧甲光向日金鱗開王
安石曰是兒言不相副也方黑雲如此安得向日之甲光也
朱子語錄曰李賀詩巧然較恠不如太白自在

後村劉氏曰樂府惟李賀最工張籍王建輩皆出其下然全
集不過一小冊世傳賀中表有妬賀才名投其集溷中故傳
於世者極少余竊意不然天地間尤物且不多得况佳句乎
使賀集不遭厄必不能一一如今所傳本之精善疑賀手自
銓擇者耳

盧仝集一卷

晁氏曰唐盧仝范陽人隱少室山號玉川子徵諫議不起唐
史稱韓愈爲河南令愛其詩厚禮之嘗作月蝕詩以譏元和
逆黨愈稱其工按其詩云元和庚寅蓋五年也憲宗遇弒在

十五年後十歲也豈追托庚寅歲事為詩乎不然則史誣也
後死于甘露之禍

陳氏曰凡三卷其詩古恠而女兒曲小婦吟有所思諸篇輒
嫵媚豔冶其第三卷號集外詩凡十首慶曆中有韓及盟者為
之序川本止前二卷

劉義詩一卷

晁氏曰唐劉義少嘗任俠殺人後更折節讀書善歌詩客韓
愈門作冰柱雪車二詩出盧仝李賀右歸齊魯不知所終今
集二十餘篇不載二詩

陳氏曰凡二卷義附見新史韓愈傳不知何處人其冰柱雪
車二詩狂恠誠出盧仝右然豈風人之謂哉

楊巨源詩一卷

晁氏曰唐楊巨源字景山河中人貞元五年第進士為張

靖從事自秘書郎擢太常博士遷禮部員外郎出為鳳翔少
尹復召除國子司業巨源在元和中詩韻不造新語體律務
實用功頗深日暮搔首微詠不輟年老成疾嘗贈弘靖詩敘
其世家云伊陟無聞祖韋賢不到孫時人稱之年滿七十丐
歸時宰惜其去以為其鄉少尹不絕其祿太和以官壽卒
陳氏曰凡五卷按韓退之有送楊少尹序蓋自司業為少尹
稱其都少尹者乃其鄉里也藝文志乃云太和河中少尹誤
第三卷末二十餘篇有目無詩

武元衡臨淮集兩卷

晁氏曰唐武元衡伯蒼河南人建中四年進士元和二年以
門下侍郎平章事出為劔南節度八年復秉政明年早朝遇
盜害之元衡工五言詩好事者傳之被於管絃嘗夏夜作詩
曰夜久喧暫息池臺惟月明無因駐清景日出事還生翌日

遇害舊有臨淮集七卷此其二也議者謂唐世工詩宦達者唯高適宦達詩工者唯元衡

陳氏曰初用蕭田李氏本傳錄後以石林氏本校益六首及李吉甫唱酬六首川本作二卷

張碧歌詩集一卷

陳氏曰唐張碧太碧撰藝文志云貞元時人集中有覽貫休上人詩或勦入之也

陳羽集一卷

陳氏曰唐東宮衛佐陳羽撰貞元八年陸贄平第二人

羊士鸚詩一卷

晁氏曰唐羊士鸚貞元元年進士第順宗時為宣歙巡官王叔文所惡貶汀州寧化尉元和初李吉甫知獎擢監察御史掌制誥嘗出為資州刺史

陳氏曰竇群引士鸚為御史共傾李吉甫

鮑溶詩五卷

晁氏曰唐鮑溶字德源元和四年進士集中有別韓博士愈詩云不知無聲淚中感一顧厚蓋退之所嘗推激也張薦謂溶詩氣力宏瞻博識清度雅正高古衆才無不備具曾子固亦愛其詩以史館本及歐公所藏互校得二百三十三篇今本有一百九十二篇餘逸

南豐曾氏曰鮑溶詩集六卷史館書舊題云鮑防集五卷崇文總目叙別集亦然知制誥宋敏求為臣言此集詩見文粹唐詩類選者皆稱鮑溶作又防之雜感詩最顯而此集無之知此詩非防作也臣以文粹類選及防雜感詩考之敏求言皆是又得參知政事歐陽脩所藏鮑溶集與此集同然後知為溶集決也史館書五卷總二百篇歐陽氏書無卷第纔百

餘篇然其三十三篇史館書所無今別為一卷附於後而總題曰鮑溶詩集六卷蓋自先王之澤熄而詩亡晚周以來作者嗜文辭抒情思而已然亦往往有可采者溶詩尤清約謹嚴而違理者少亦近世之能言者也故既正其誤謬且著其大旨以傳焉

竇拾遺集一卷

陳氏曰唐左拾遺扶風竇叔向撰包何為序群庠牟鞏皆其子也

賈長江集十卷

晁氏曰唐賈島浪仙詩共三百七十九首唐書稱島范陽人初為浮屠名無本後從韓愈遂去浮屠舉進士累舉進士不第文宗時坐飛謗謫長江主簿會昌初終普州司倉參軍今長江祠堂中有石刻大中九年墨制大中宣宗年號與傳不合據言又載武帝時謫去尤差誤

陳氏曰韓退之有送無本詩即其人也後返初舉進士不第文宗時坐飛謗貶長江會昌初以普州參軍卒本傳所載如此今遂寧刊本首載大中墨制云比者禮部奏卿風狂遂且養疾閔外今却攜卷軸潛至京城遇朕微行聞卿諷詠觀其志業可謂屈人是用顯我特恩賜卿墨制宜從短簿別俟殊科與傳所稱飛謗不同蓋宣宗好微行小說載島應對忤旨好事撰此制以實之安有微行而顯著訓詞者首稱奏卿風狂尤為好笑當以本傳亦據其墓誌也唐貴進士科故誌言責授長江如溫飛卿亦謫方城尉當時謂鄉貢進士不博上州刺史則簿尉固宜謂之責授欲使今世進士得罪而責授簿尉則惟恐責之不早耳

姚少監集十卷

晁氏曰唐姚合也崇曾孫以詩聞元和十一年李逢吉知舉進士歷武功主簿富平萬年尉寶應中監察殿中御史戶部員外郎歷金杭二州刺史為刑戶二部郎中諫議大夫給事中陝號觀察使開成末終秘書監世號姚武功云

陳氏曰川本卷數同編次異

莊南傑集一卷

李涉歌詩一卷

晁氏曰唐李涉渤之弟也早從陳許辟一再謫官夷陵大和中為大學博士自號清溪子渤三詩附

殷堯藩集一卷

陳氏曰唐侍御史殷堯藩撰元和九年進士

章孝標集一卷

陳氏曰唐秘書省字章孝標撰元和十四年進士

熊孺登集一卷

陳氏曰唐西川從事熊孺登撰元和中人執易其從姪也

施肩吾西山集五卷

晁氏曰唐施肩吾吳興人元和十五年進士以豫章之西山乃十二真仙羽化之所心慕之因卜隱焉且以名其所著自為之序

雍裕之集一卷

陳氏曰唐雍裕之撰未詳何時人

雍陶詩五卷

晁氏曰唐雍陶國鈞大和八年進士大中六年自國子毛詩博士出刺簡州唐志集十卷今亡其半

張南史集一卷

陳氏曰唐試參軍范陽張南史撰

唐史藝文志南史字季直幽州人以試參軍避亂于揚州再召之未赴而卒

王涯集一卷

陳氏曰唐宰相王涯廣津撰

袁不約集一卷

陳氏曰唐袁不約還朴撰長慶三年進士其年試麗龜賦

李紳追昔游集三卷

晁氏曰唐李紳公垂也亳州人元和元年進士補國子助教穆宗召為翰林學士累進中書舍人武宗即位拜中書侍郎平章事紳為人短小精悍於詩最有名號短李與李德裕元稹同時號三俊追昔游者蓋賦詩紀其平生所遊歷謂起梁黃歸諫署升翰苑及播越荆楚踰嶺嶠上高安移九江過鍾

陵守除陽轉壽春留洛陽廉會稽分務東周守蜀鎮梁也開成戊午八月自為之序

陳氏曰皆平生歷官及遷謫所至述懷紀遊之作也余嘗書其後云讀此篇見其飾志矜能夸榮殉勢益知子陵元亮為千古高人

朱景玄集一卷

陳氏曰唐太子諭德朱景玄撰

朱慶餘集一卷

陳氏曰唐朱可久慶餘撰以字行受知於張籍寶曆二年進士

文獻通考卷之三百四十二

經籍

集

文獻通考卷之三百四十二

十七

成

文獻通考卷之二百四十三

宋鄱陽馬端臨貴與著

明蘄陽馮天馭應房校刊

經籍考 集詩集

李義山集三卷

陳氏曰唐太學博士李商隱義山撰

詩話云荆公晚年亦喜稱義山詩以為唐人知學老杜而得其藩籬惟義山一人而已每誦其雪嶺未歸天外使松州猶駐殿前軍永憶江湖歸白髮欲回天地入扁舟與池光不受月暮氣欲沉山江海三年客乾坤百戰場之類雖老杜亡以過也義山詩合處信有過人若其用事深僻語工而意不及自是其短世人反以為奇而效之故崑體之弊適重其失義山本不至是云詩到義山謂之文章一厄以其用事僻澁時

矣



稱西崑體然荆公晚年亦或喜之而字字有根蒂如試問火城將策探何如雲屋聽窻知未愛京師傳谷口但知鄉里勝壺頭其用事琢句前輩無相犯者

漁隱叢話李義山詩楊大年諸公皆深喜之然淺近者亦多如華清宮詩云華清恩恨古無倫猶恐蛾眉不勝人未免被他褒女笑只教天子暫蒙塵用事失體在當時非所宜言也豈若崔魯華清宮詩云障掩金雞蓄禍機翠華西拂蜀雲飛珠簾一閉朝元閣不見人歸見燕歸又云草遮回磴絕鳴鸞雲樹深深碧殿寒明月自來還自去更無人倚玉欄干語意既精深用事亦隱顯也義山又有馬嵬詩云如何四紀為天子不及盧家有莫愁渾河中詩云咸陽原上英雄骨半是君家養馬來如此等詩庸非淺近乎

溫庭筠金笈集七卷外集一卷

晁氏曰唐溫庭筠本名岐字飛卿宰相彥博之裔詩賦清麗與李商隱齊名時號溫李能逐弦吹之音為側艷之辭為行塵雜由是累年不第終國子助教宣宗嘗作詩賜宮人句有金步搖遣場中對之庭筠對以玉跳脫上喜其敏欲用之而嘗作詩忤時相令狐洵終廢斥云

張祐詩一卷

晁氏曰唐張祐字承吉清河樂高尚客淮南杜牧為度支使善其詩嘗贈之詩曰何人得似張公子千首詩輕萬戶侯嘗作淮南詩有人生只合楊州死禪智山光好墓田之句大中中果終丹陽隱舍人以為讖云 陳錄凡十卷

許渾丁卯集二卷

晁氏曰唐許渾字用晦圍師之後大和六年進士為當塗大平二令以病免起潤州司馬大中三年為監察御史歷虞部

負外睦郢二州刺史嘗分司於朱方丁卯間自編所著因以爲名賀鑄本跋云按渾自序集三卷五百篇世傳本兩卷三百餘篇求訪二十年得沈氏曾氏本并取擬玄天竺集校正之共得五百四十四篇予近得渾集完本五百篇皆在然止兩卷唐藝文志亦言渾集兩卷鑄稱三卷者誤也

陳氏曰丁卯者其所居之地有丁卯橋蜀本又有拾遺二卷後村劉氏曰杜牧許渾同時然各爲體牧於唐律中常寓少拗峭以矯時弊渾則不然如荆樹有花兄弟樂橘林無實子孫忙之類律切麗密或過牧而抑揚頓挫不及也二人詩不著姓名亦可辨樊川有續別集三卷十之八九皆渾詩牧佳句自多不必又取他人詩益之若丁卯集割去許多傑作則渾詩無一篇可傳矣

李遠集一卷

陳氏曰唐建州刺史李遠求古撰

于鵠集一卷

陳氏曰唐于鵠撰與張籍同時未詳何人

薛瑩集一卷

陳氏曰唐薛瑩撰號洞庭集文宗時人集中多蜀詩其曰壬寅歲者在前則爲長慶四年後則爲中和二年未知定何年也

薛逢歌詩二卷

晁氏曰唐薛逢陶臣河東人會昌元年進士終秘書監持論鯁切以謀畧高自標顯與楊收王鐸同年登第而逢文藝最優收作相逢有詩云誰知金印朝天客同是沙隄避路人鐸作相逢又有詩云昨日鴻毛萬鈞重今朝山岳一毫輕二人皆怒故不見齒

喻鳧集一卷

陳氏曰唐烏程尉喻鳧撰開成五年進士

潘咸集一卷

陳氏曰唐潘咸撰不知何人與喻鳧同時藝文志不載

項斯集一卷

陳氏曰唐丹徒尉江東項斯子遷撰初受知於張籍水部而揚敬之祭酒亦知之有逢人說項斯之句會昌四年進士

趙嘏渭南詩三卷

晁氏曰唐趙嘏承祐也會昌四年進士終渭南尉杜紫微讀其早秋詩云殘星幾點鴈橫寒長笛一聲人倚樓因謂之趙倚樓云

馬戴集一卷

陳氏曰唐馬戴虞臣撰會昌四年進士

顧非熊集一卷

陳氏曰唐盱眙主簿顧非熊况之子會昌五年進士

薛許昌集十卷

晁氏曰唐薛能字大拙汾州人會昌六年登進士第大中末書判中選補盤屋尉辟太原陝虢河陽從事李福鎮滑表署觀察判官歷御史都官刑部員外郎福徙西蜀奏以自副咸通中攝嘉州刺史造朝遷主客度支刑部郎中俄刺同州京兆尹溫璋貶命權知尹事出帥咸化入授工部尚書復節度徐州徙忠武廣明元年徐軍戍潞水經許能以軍懷舊惠館之城中許軍懼見襲大將周岌乘釁疑怒遂能據城自稱留後因屠其家能政嚴察絕私謂癖於詩日賦一章晚節惑浮屠法奉之唯謹然資鰲倨故佻輕以忤物及為藩鎮充易武吏嘗命其子屬橐鞬雅拜新進士或問其故曰與渠銷弭災

容齋洪氏隨筆曰能晚唐人詩格調不甚高而妄自尊大其
海棠詩荔枝詩折楊柳十詩序可見而所作皆無過人又別
有柳枝詞五首最後一章曰劉白蘇臺總近時當初章句是
誰推纖腰舞盡春楊柳未有儂家一首詩自註云劉白二尚
書繼爲蘇州刺史皆賦楊柳枝詞世多傳唱雖有才語但文
字太僻宮商不高耳其大言如此但稍推杜陵視劉白以下
茂如也今讀其詩正堪一笑劉之詞云城外春風吹酒旗行
人揮袂日西時長安陌上無窮樹唯有垂楊管別離由之詞
云紅板江橋青酒旗館娃宮暖日斜時可憐雨歇東風定萬
樹千條各自垂其風流氣槩豈能所可髣髴哉
後村劉氏曰能自稱舉太過五言云空餘氣長在天子用平
人不但自譽其詩又自譽其材然位歷節鎮不爲不用矣卒

以驕恣凌忽僨軍殺身其材安在妄庸如此乃敢妄議諸葛
可謂小人之無忌憚者

李群玉詩一卷

晁氏曰唐李群玉文山澧州人曠逸不樂仕進專以吟詠自
適詩筆妍麗才力邁健好吹笙美筆翰親友強赴舉一上而
止裴休廉察湖南延郡中大中八年來京師進詩三百篇休
復論薦授弘文館校書郎集後附其進詩表并除官制本平
廣記所載黃陵廟事甚異其絕句在焉

陳氏曰裴休以處士薦集後有乞假歸別業及朝士送行詩
曹鄴集一卷

陳氏曰唐洋州刺史曹鄴撰大中四年進士

鄭嵎津陽門詩一卷

晁氏曰唐鄭嵎字賓先大中五年進士津陽即華清宮之外

闕岨開成中過之聞逆旅主人道承平故實明日馬上裁刻
成長句一千四百言自有序云

陳氏曰或作愚者非也愚嘗為嶺南節度好着錦半臂非此
鄭岨

劉駕集一卷

陳氏曰唐劉駕司南撰大中六年進士

李頻集一卷

陳氏曰唐建州刺史新定李頻德新撰大中八年進士姚合
之壻也

李郢端公詩一卷

晁氏曰唐李郢楚望也大中十年進士詩調清麗居餘杭踈
於馳競為藩鎮從事兼侍御史

陳蛻詩一卷

晁氏曰唐陳蛻未詳其行事集有長安十五詠自序云蛻生
長江淮間以詩句從賦僅十餘年矣今我后撫運澤及四海
蛻復得為太平人云云蓋肅代間人也

柳郊詩一卷

晁氏曰唐柳郊集有與李端盧綸輩相酬贈詩大曆間進士
也

斷金集一卷

晁氏曰唐李逢吉令狐楚自未第至貴顯所唱和詩也後逢
吉卒楚編次之得六十餘篇裴夷直名曰斷金集為之序

孟達詩一卷

晁氏曰唐孟達字叔之平昌人會昌五年陳商下及第

儲嗣宗集一卷

陳氏曰唐儲嗣宗撰大中十三年進士

司馬先輩集一卷

陳氏曰唐司馬禮撰與儲嗣宗同時

李廓集一卷

陳氏曰唐武寧節度使李廓撰程之子也

于潛集一卷

陳氏曰唐于潛子綺撰咸通二年進士

李昌符集一卷

陳氏曰唐膳部員外郎李昌符撰咸通四年進士

司空表聖集十卷

陳氏曰唐兵部侍郎司空圖表聖撰咸通十年進士別有全集此集皆詩也其子永州刺史尚為後記

聶夷中集一卷

陳氏曰唐華陰尉聶夷中撰咸通十二年進士

許棠集一卷

陳氏曰唐宛陵許棠文化撰亦咸通十二年進士

林寬集一卷

陳氏曰唐林寬撰與李頗許棠皆同時集有送二人詩

周繇集一卷

陳氏曰唐周繇撰咸通十三年進士

無譏集四卷

陳氏曰唐崔櫓撰僖宗時人

章碣集一卷

陳氏曰唐章碣撰亦僖宗時人

高蟾集一卷

陳氏曰唐御史中丞高蟾撰乾符三年進士

崔全集一卷

陳氏曰唐御史中丞高蟾撰乾符三年進士

陳氏曰唐崔塗禮山撰光啓四年進士

雲臺編三卷宜陽外編一卷

晁氏曰唐鄭谷字守愚宜陽人光啓三年擢高第遷右拾遺歷都官郎中乾寧四年歸宜春卒于別墅其集號雲臺編者以其扈從華山下觀居所編次云谷詩屬思頗切於理而格韻凡猥語句浮俚不競不為議者所多然一時傳諷號鄭都官而弗名也

歐陽氏詩話曰鄭谷詩名盛於唐末號雲臺編而世俗但稱其官為鄭都官其詩極有意味亦多佳句但其格不甚高以其易曉人家多以教小兒余為兒時猶誦之今其集不行於世矣

周朴詩一卷

唐處士周朴撰歐公詩話曰唐之晚年詩人無復李杜豪放

之格然亦務以精意相高如周朴者構思尤艱每有所得必極其雕琢故時人稱朴詩月鍛季鍊未及成編已播人口其名重當時如此而今不復傳矣余少時猶見其集其句有云風暖鳥聲碎日高花影重又云曉來山雨鬧雨過杏花稀誠佳句也

韓偓詩二卷香奩集一卷

晁氏曰唐韓偓致堯京兆人龍紀元年進士累遷諫議大夫翰林學士昭宗幸鳳翔進兵部侍郎承旨朱全忠怒貶濮州司馬榮懿尉天祐初挈族依王審知而卒香奩集沈括筆談以為和凝所作疑既貴惡其側艷故詭稱偓著或謂括之言妄許彥周詩話高秀實言元微之詩艷麗而有骨韓偓香奩集麗而無骨李端叔意喜韓偓詩誦其序云咀五色之靈芝香生九竅咽三危之瑞露美動七情秀實云動不得也

石林葉氏曰僊在閩所為詩皆手自寫成卷嘉祐間喬孫奕出其數卷示人龐穎公為漕取奏之因得官詩文氣格不甚高吾家僅有其詩百餘篇世傳別本有名香齋集者唐書藝文志亦載其辭皆閨房不雅馴或謂江南韓熙載所為誤以為僊若然何為錄於唐志乎熙載固當有之然吾所藏僊詩中亦有一二篇絕相類豈其流落亡聊中姑以為戲然不可以為訓矣

又曰韓僊傳自貶濮州司馬後載其事即不甚詳其再召為學士在天祐二年吾家所藏僊詩雖不多然自貶後皆以甲子歷歷自記其所在有乙丑年在袁州得人賀復除戎曹依舊承旨詩即天祐二年也昭宗前一年已弒蓋哀帝之命也未句云若為將朽質猶擬杖於朝固不往矣其後又有丁卯年正月聞再除戎曹依前充職詩末句云豈獨鴟夷解歸去

五湖魚艇且鋪糟天祐四年也是嘗兩召皆辭唐史止書其一是歲四月全忠篡其召命自哀帝之世自後復召則癸酉年南安縣之作即梁之乾化二年時全忠亦已被弒明年梁亡其兩召不行非特避禍蓋終身不食梁祿其大節與司空表聖畧相等惜乎唐史不能少發明之也

唐英集三卷

陳氏曰唐翰林學士吳融子華撰與僊皆龍紀元年進士

張蠙詩一卷

晁氏曰僊蜀張蠙字象文清河人唐乾寧中進士為校書郎櫟陽尉犀浦令建開國拜膳部員外郎後為金堂令王衍與徐后遊大慈寺見壁間書牆頭細雨垂纖草水面回風聚落花愛之問知蠙句給札令以詩進蠙以二百首獻衍頗重之將召為知制誥宋光嗣以其輕傲止賜白金而已蠙生而穎

秀幼能爲詩作登單于臺有白日地中出黃河天外來之句
爲世所稱

靈溪集七卷

陳氏曰唐校書郎上饒王貞白有道撰乾寧二年進士其集
有自序求豐人有藏之者洪景廬得而刻之詩雖多在一時
儕輩未爲工也

翁承贊集二卷

陳氏曰唐諫議大夫京兆翁承贊文堯撰乾符二年進士
楮載集一卷

陳氏曰唐楮載厚之撰

王穀集一卷

陳氏曰唐王穀虛中撰二人皆乾寧五年進士

盧延讓詩一卷

晁氏曰僞蜀盧延讓子善也范陽人唐光化九年進士朗陵
雷蒲辟蒲敗歸王建及僭號授水部員外郎累遷給事中卒
官終刑部侍郎延讓師薛能詩不尚奇巧人多請其淺俗獨
吳融以其不蹈襲大奇之

牛嶠歌詩三卷

晁氏曰僞蜀牛嶠字延峰隴西人唐相僧孺之後博學有文
以歌詩著名乾符五年進士歷拾遺補闕尚書郎王建鎮西
川辟判官及開國拜給事中卒集本三十卷自序云竊慕李
長吉所爲歌詩輒効之

章莊浣花集五卷

晁氏曰僞蜀章莊字端已仕王建至吏部侍郎平章事集乃
其弟藹所編以所居即杜甫草堂舊址故名僞史稱莊有集
二十卷今止存此

王駕集一卷

陳氏曰唐彭城王駕大用撰大順元年進士自號守素先生喻坦之集一卷

陳氏曰唐喻坦之撰

張喬集一卷

陳氏曰唐進士九華張喬撰喬與許崇張蠟鄭谷喻坦之等同時號十哲喬試京兆月中桂詩擅場傳於今而登科記無名蓋不中第也

高駢集一卷

陳氏曰唐淮南節度使高駢撰

周賀集一卷

陳氏曰唐周賀撰嘗為僧名清塞後反初故別本文號清塞集

晁氏曰清塞字南卿詩格清雅與賈島無可齊名寶曆中姚合為杭因携書投謁合聞其誦哭僧詩云凍湏亡夜剝遺傷病中書大愛之因加以冠巾為周賀云

李洞詩一卷

晁氏曰唐李洞字才江諸王之孫慕賈島為詩銅鑄其像事之如神時人多謂其僻澁不貴其奇峭唯吳融稱之昭宗時不第遊蜀卒

陳氏曰與張喬同時稱餘杭明經潘熙載編

曹唐詩一卷

晁氏曰唐曹唐字堯賓桂州人物為道士咸通中為府從事卒作游仙詩百編或斬之曰堯賓嘗作咒詩唐曰何也井底有天春寂寂人間無路月茫茫非鬼詩而何唐乃大晒今集中不見然它詩及神仙者尚多

陳氏曰唐有大小游仙詩

來鵬集一卷

陳氏曰唐豫章來鵬撰咸通中舉進士不第

任藩集一卷

陳氏曰唐任藩撰或作翻客居天台有宿帽幘山絕句爲人所稱今城中巾子山也

後村劉氏曰唐任藩詩存者五言十首而已然多佳句衆鳥已歸樹旅人猶過山贈僧云半頂髮根白一生心地清居然可愛令人動爲千百首而無一可傳者

方干詩集一卷

晁氏曰唐方干字雄飛歙人唐末舉進士不第隱鏡湖上徐疑有詩名一見于噐之授以詩律其貌窘陋又兔關而喜凌侮嘗謁廉帥誤三拜人號方三拜將薦于朝而卒門人謚玄

英先生其甥楊弁與孫郃編次遺詩王贊爲序郃文爲玄英先生傳附

王德輿詩一卷

晁氏曰唐王德輿集有次韻和鄭畋詩知其懿僖間人也

沈彬集一卷

晁氏曰南唐沈彬保大中以尚書郎致仕居高安集中有與韋莊杜光庭貫休詩唐末三人皆在蜀疑其同時避亂嘗入蜀云上李昇山水圖詩在焉

熊皦屠龍集五卷

晁氏曰晉熊皦後唐清泰二年進士爲延安劉景岩從事天福中說景岩歸朝擢右司諫坐累黜上津令集有陶穀序陳沆賞皦早梅云一夜欲開盡百花猶未知曰太妃容德於是手在

陳氏曰集中多下第詩蓋老於場屋者

杜荀鶴唐風集十卷

晁氏曰唐杜荀鶴池州人大順二年進士善為詞句切理宣
州田頰重之嘗以牋問至梁祖薦為翰林學士主客員外侍
勢侮易搢紳衆怒欲殺之而未及天祐初病卒有顧雲序荀
鶴自號九華山人 陳錄作三卷

幕府燕談杜荀鶴詩鄙俚近俗惟宮詞為唐第一云早被嬋
娟誤欲粧臨鏡慵承恩不在貌教妾若為容風暖鳥聲碎日
高花影重年年越溪女相憶採芙蓉故諺云杜詩三百首惟
在一聯中正謂風暖日高之句也此句歐公詩話以為周朴詩

詠史詩三卷

陳氏曰唐邵陽胡曾撰凡一百五十首曾咸通末為漢南從
事

羅江東集十卷

陳氏曰唐羅隱詔諫撰

劉滄詩一卷

晁氏曰唐劉滄字蘊靈大中八年進士詩頗清麗句法絕類
趙嘏

羅鄴集一卷

晁氏曰唐羅鄴撰

曹松集一卷

晁氏曰唐曹松夢徵也舒州人學賈島為詩天復元年與王
希羽劉象柯崇鄭希顏同登第年皆七十餘號五老榜時以
新平內難聞放進士喜特勅授校書郎而卒

陳氏曰別本與印本互有詳畧但別本大遊仙十三首乃曹
唐詩也

羅虬氏紅兒詩一卷

晁氏曰唐羅虬撰皇朝方性天註虬詞藻富贍與其族人隱鄴齊名時號三羅從鄆州李孝恭籍中有杜紅兒者善歌常為副使者屬意副使聘鄰道虬請紅兒歌贈之以綵孝恭不令受虬怒拂衣起詰旦手刃之既而追其冤作絕句詩百篇借古人以比其艷盛行於世

唐彥謙鹿門詩一卷

晁氏曰唐唐彥謙字茂鄴并州人咸通末進士中和王仲榮表河中從事歷節度副使晉絳二州刺史重榮遇害貶漢中掾興元楊守亮留署判官遷副使閬壁刺史卒彥謙才高負氣無所摧屈博學多藝尤能七言詩師溫庭筠故格體類之世稱耳聞明主提三尺眼見愚民盜一抔蓋彥謙句也自號鹿門先生有薛廷珪序

後村劉氏曰揚劉諸人師李義山可也又師唐彥謙唐詩雖雕斲對偶然求如一抔三尺之聯惜不多見五言叙亂離云不見泥函谷俄驚火建章剪茅行殿濕伐栢舊陵香語猶渾成未甚破碎若西崑酬唱集對偶字面雖工而佳句可錄者殊少宜為歐公所厭也

秦韜王投知小錄三卷

晁氏曰唐秦韜王字中明京兆人有詞藻工歌吟險而好進為田令孜所善僖宗幸蜀令孜引為工部侍郎中和二年賜進士第編入春榜

東浮集九卷

陳氏曰唐荆南崔道融撰自稱東歐散人乾寧乙卯永嘉山齋編成蓋避地於此今闕第十卷

唐詩三卷

陳氏曰崔道融撰皆四言詩述唐中世以前事實事為一篇
篇各有小序凡六十九篇

裴說集一卷

陳氏曰唐裴說撰天祐三年進士狀頭唐蓋將亡矣說後為
禮部員外郎世傳其寄邊衣古詩甚麗此集無之僅有短律
而已非全集也其詩有避亂一身多之句

劉德仁詩集一卷

晁氏曰唐劉德仁公主之子長慶中以詩名五言清瑩獨步
文場者開成後昆弟皆居顯仕獨自苦於詩舉進士二十年
竟無所成嘗有寄所知詩云外族帝王恩中朝親故稀翻令
浮議者不許九霄飛及卒詩僧樓白以絕句吊之曰忍苦為
詩身到此冰魂雪魄已難招直教桂子落墳上生得一枝冤
始銷

唐求集一卷

陳氏曰唐唐求撰與顧非熊同時藝文志不載

李山甫集一卷

陳氏曰唐魏博從事李山甫撰唐末進士不第

邵謁集一卷

陳氏曰唐國子生曲江邵謁撰集後有胡賓王者為之序言
其沒後降巫賦詩自稱邵先輩殆若今世請大仙之類耶

李推官披沙集六卷

陳氏曰唐李咸用撰其八世孫兼孟達居宛陵亦能詩嘗為
台州出其家集求楊誠齋作序

誠齋序畧曰推官公詩如見後却無語別來長獨愁如危城
三面水古樹一邊春如月明千嶠雪灘急五更風如煙殘偏
有焰雪甚却無聲如春雨有五色灑來花旋成如雲藏山色

晴還媚風約溪聲靜又回如未醉已知醒後憶欲開先爲落
聲愁蓋征人淒苦之情孤愁窈眇之聲騷客婉約之靈風物
榮悴之英所謂周禮盡在魯矣讀之使人發融冶之歡於荒
寒無聊之中動慘戚之感於笑談方懌之後國風之遺音江
左之異曲孰謂其果弦絕歟

黃御史集

誠齋序畧曰詩至唐而盛至晚唐而工御史黃公之詩尤奇
如聞鴈一聲初觸夢半白已侵頭餘燈依古壁片月下滄州
如遊東林寺寺寒三伏雨松偃數朝枝如退居青山寒帶雨
古木夜啼猿此與韓致堯吳融輩並遊未知何人徐行後長
也永豐君自言其集久逸其父考功公始得之僅數卷而已
其後永豐又得詩文五卷於呂夏卿之家又得逸詩於翁承
贊之家又得銘碣於浮屠老子之宮而後御史公之文復傳

於二百年之後按唐藝文志御史諱滔字文江光啓中爲四
門博士其集舊曰黃符集云

于武陵集一卷

周濟集一卷

陳光集一卷

劉威集一卷

陳氏曰皆唐人于武陵大中進士餘莫詳何時濟集仍甄文
志不載

胡笳十八拍一卷

晁氏曰唐劉商撰漢蔡邕女琰爲胡騎所掠因胡人吹蘆葉
以爲歌遂翻爲琴曲其辭古淡商因擬之以叙琰事盛行一
時商彭城人擢進士第歷臺省爲郎好道術隱義興胡父渚
世傳其仙去

鼎國詩三卷

晁氏曰後唐李雄撰雄洛鞏人莊宗同光甲申歲遊金陵成

都鄴下各為詠古詩三十章以三國鼎峙故曰鼎國
李有中詩二卷

晁氏曰南唐李有中嘗為新塗令與水部郎中孟賓于善賓于稱其詩如方干賈島之徒賓于晉天福中進士也有中集中有贈韓張徐三舍人詩韓乃熙載張乃洎徐乃鉉也春月詩云乾坤一夕雨草木萬方春頗佳他皆稱是

殷文珪集一卷

陳氏曰唐殷文珪撰乾寧五年進士後仕南唐其子曰崇義歸朝更姓名即湯悅也

盧士衡集一卷

陳氏曰後唐盧士衡撰天成二年進士

劉昭禹集一卷

陳氏曰湖南天策府學士桂陽劉昭禹撰

符蒙集一卷

陳氏曰題符侍即同光三年進士也同年四人蒙初為狀頭覆試為第四

李建勳集一卷

陳氏曰南唐宰相李建勳撰

孟賓于集一卷

陳氏曰五代進士孟賓于撰仕湖南江南

廖匡圖集一卷

陳氏曰湖南從仕廖匡圖撰

江為集一卷

陳氏曰五代建安江為撰為王氏所誅當漢乾祐中

劉一集一卷

陳氏曰似唐末五代人藝文志不載其詩怪而不律亦不工

文丙集一卷

陳氏曰稱布衣文丙所業未詳何人

蔣吉集一卷

蘇拯集一卷

王周集一卷

陳氏曰皆未詳何人

皎然杼山集十卷

晁氏曰唐僧皎然字清晝吳興人謝靈運十世孫攻篇什德宗詔錄本納集賢院集前有于頔序并贈晝上人詩

陳氏曰顏魯公為刺史與之酬倡其後刺史為作集序所居龍興寺之西院今天寧寺是也又嘗居杼山寺在妙喜

唐史藝文志顏真卿為刺史集文士撰韻海敬源預其論者真元中集賢御書院取其集藏之

石林葉氏曰唐詩僧皎然居湖州妙喜今寶積寺是其故廬自言謝靈運後詩祖其家法自許其高顏魯公為守時與張

志和陸鴻漸皆為客意其人品亦必不凡吾嘗至妙喜訪其遺跡無復有但山顛墳存耳其詩十卷尚行於世無甚令人喜者以為優於唐詩僧可也觀其詩評亦賤駭老杜如論送高三十五書記詩云崆峒小麥熟且願休王師請君問主將安用窮荒為以為四句已前不見題則其所知可見矣

僧靈澈詩集一卷

澈姓湯字源澄越州人劉夢得序曰如芙蓉園新寺詩云經來白馬寺僧到赤鳥年謫汀州云青蠅為吊客黃耳寄家書可謂入作者閫域豈特雄於詩僧間耶雪浪齋日記靈澈詩僧中第一如海日生殘夜江春入暮年窓風淋硯水山雨慢琴絃前輩評此詩云轉石下千仞江

寶月詩一卷

晁氏曰唐僧貫休撰字德隱姓姜氏婺州人後本蜀號禪月

大師初莫融爲之序其弟子曇域削去別爲序引僞蜀乾德中獻之

靈一集一卷

陳氏曰唐僧與皇甫曾同時

無可集一卷

陳氏曰唐僧賈無可撰島弟也

碧雲詩一卷

晁氏曰唐僧虛中詩也司空圖嘗以詩贈之云十年太華無知己只得虛中一首詩

白蓮集一卷

陳氏曰唐僧齊已撰長沙胡氏

柳白集一卷

修睦東林集一卷

尚顏供奉集一卷

陳氏曰皆唐僧自貫休而下盡唐末人也修睦死於惟楊朱

瑾之難

薛洪度詩一卷

晁氏曰唐薛濤字洪度西川樂妓工爲詩當時人多與酬贈武元衡奏校書即大和中卒李肇云樂妓而工詩者濤亦文妖也

陳氏曰號薛校書世傳奏授恐無是理殆一時州鎮褒借爲戲如今世白帖借補之類耶濤得年最長至近八十

李季蘭集一卷

陳氏曰唐女冠與劉長卿同時相譏調之語見中興間氣集

魚玄機集一卷

陳氏曰唐女冠坐妬殺女婢抵死

花蕊夫人詩一卷

晁氏曰僞蜀孟昶愛姬青城費氏女幼能屬文長於詩宮詞

尤有思致蜀平以俘輸織室後有罪賜死

伍喬集一卷

陳氏曰本江南進士後歸朝

李九齡集一卷

陳氏曰洛陽李九齡撰乾德二年進士第三人

文獻通考卷之二百四十三

文獻通考卷之二百四十四

宋鄱陽 馬端臨 貴與 著

明蘄陽 馮天馭 應房 校刊

經籍考

集詩集

寇忠愍詩三卷

晁氏曰寇準字平叔華州人太平興國中登進士科淳化五年參知政事定策立真宗為皇太子景德元年拜平章事契丹入寇決親征之策凡三入相真宗不豫皇后願政準白上請太子監國因令楊億草制且進億以代丁謂訪朝準被酒漏言累貶雷州司戶徙衡州司馬卒仁宗時贈中書令謚愍愍嘗封萊國公初篤學喜屬文尤長詩什多得警句在相位論議忠直不顧身謀仇邪媒孽既以謫死或又謗之云在相

位時與張齊賢相傾朱能為天書降乾祐準知而不言曾子固明其不然曰審如是丁謂拂須固足以悅之司馬溫公訓儉文亦言其奢侈子孫巧於海上然以史考之萊公蓋無子也集有范雍叙共二百四十首野水無人渡及江南春二首皆在獨到海只十里之詩已亡其全篇矣

陳氏曰巴東集三卷公初以將作監丞知巴東縣自擇其詩百餘篇且為之序今刻於巴東忠愍公集三卷乃河陽守范雍得公詩二百首為三卷今刻板道州

張刑部詩

王介甫序君詩明而不華喜諷道而不刻切其唐人善詩者之徒歟君並楊劉生楊劉以其文詞染當時學者迷其端原靡然窮日力以摹之粉墨青朱顛錯叢厖無文章黼黻之序其屬情籍事不可考據也方此時自守不污者少矣君詩獨

不然其自守不污者邪

魏仲先草堂集二卷

鉅鹿東觀集二卷

晁氏曰魏野字仲先陝州人志清逸以吟詠自娛忘懷榮利隱于陝之東郊手植竹木繞以流泉鑿土袤丈曰樂天洞前立草堂為詩清苦句多警策與寇準王旦善每往來酬唱祀汾陰歲召不起卒贈著作郎集有薛田序鉅鹿東觀集乃野之子閑集其父詩四百篇以贈著作故以東觀名集

潘道遥詩三卷

晁氏曰皇朝潘闕字道遥大名人通易春秋尤以詩知名太宗嘗召對賜進士第將官使之不就王繼恩與之善繼恩下獄捕闕甚急父之弗得咸平初來京師尹收繫之真宗釋其罪以為滁州參軍後卒于泗上與王禹偁孫何柳開魏野交好最密集有祖無擇序錢易張達皆稱其墓附于集後蘇子

瞻少年時過一山院見壁上有句云夜涼知有雨院靜若無僧而不知何人詩今集有此聯乃閻夏日宿西禪院詩也小說中謂閻坐廬多遜黨嘗追捕非也

陳氏曰閻嘗賜及第後坐追奪變姓名僧服入中條山卒於泗州又有嚴陵刻本同但少卷末三首

東里楊聘君集一卷

陳氏曰處士鄭圃楊朴契元撰太宗嘗召對拜郎中不受以其子爲長水尉

滕工部集一卷

陳氏曰滕白撰篇首寄陳搏知爲國初人又有右省懷山中及臺中寄朱從事詩則其揚歷清要亦多矣史傳亡所見未有考也

玉岳集一卷

陳氏曰王岳撰集中有春日感懷上滕白郎中蓋亦國初人又有聖駕親征河東及有甲午避寇全家欲下荆南之語則是李順亂蜀之歲岳蓋蜀人也耶

漁舟集一卷

陳氏曰處士成都郭震希聲撰自稱汾陽山人李旼爲作集序淳化四年忽作詩曰朝出東門遊東門好春色青青原上草莫放征馬食詣闕獻書言蜀利病未幾順賊已作矣

王初歌詩集一卷

陳氏曰王初撰未詳何人有延平天慶觀詩當是祥符後人也

書臺集三卷

陳氏曰處士南隆朱有大有撰自稱雲臺山人天禧中王晦叔守蜀以古風六十言遺之書臺者其所居坊名也

甘棠集一卷

陳氏曰知制誥上蔡孫僅鄰幾咸平元年進士第一人後其兄何一勝嘗從何通判陝府以所賦詩集而序之首篇曰甘棠思循吏故以名集僅兄弟皆不壽故不大顯

錢氏白歌詩二卷

陳氏曰翰林學士吳越錢易希白撰廢王侁之子咸平二年進士第二人景德二年制科初錢氏歸國群從皆補官獨易與兄昆不見錄遂刻志讀書皆第進士昆至諫議大夫易子彥遠明逸又皆以賢良方正入等宋興父子兄弟制舉登科者惟錢氏一門易有集百五十卷未見家止有此及滑稽集四卷而已

林和靖詩三卷

西湖紀逸一卷

晁氏曰林逋字君復杭州錢塘人少立志為學結廬西湖之

孤山真宗聞其名詔郡縣常存遇之善行書喜為詩其語孤峭澄淡臨終作一絕曰茂陵他日求遺藁猶喜初無封禪書或刻石置之其墓中賜謚曰和靖先生

清風集一卷

陳氏曰職方員外郎鮑當撰

石曼卿集一卷

晁氏曰石延年字曼卿南京宋城人舉進士不中為三班奉職改太常寺太祝遷秘閣校理氣貌雄偉喜論事善書札縱酒不羈世多傳其仙去其詩如春陰紅梅及樂意相關禽對語生香不斷樹交花鶯聲不逐春光老花影常隨日脚流之句至今諷詠焉

陳氏曰其詩自為序石介復為作序其仕以三舉進士為三班奉職出處詳見歐公所作墓誌

歐公詩話曰石曼卿自少以詩酒豪放自得其氣貌偉然詩格奇峭又工於書筆畫道勁體兼顏柳爲世所珍余家嘗得南唐後主澄心堂紙曼卿爲余以此紙書其籌筆驛詩詩曼卿平生所自愛者至今藏之號爲三絕真余家寶也曼卿卒後其故人有見之者云恍惚如夢中言我今爲鬼仙也所主芙蓉城欲呼故人往遊不得忿然騎一素騾去如飛其後又云降於亳州一舉子家又呼舉子去不得因留詩一篇與之余亦畧記其一聯云鶯聲不逐春光老花影長隨日脚流神仙事怪不可知其詩頗類曼卿平生語舉子不能道也張浮休評曼卿詩如飢鴈夜歸岩水春拚俊爽有餘而不可尋繹朱子語錄因舉石曼卿詩極有好處如仁者雖無敵王師固有征無私乃時雨不殺是天聲長篇其舊於某人處見曼卿親書此詩大字氣象方嚴道勁極可寶愛真所謂顏筋

柳骨令人喜蘇子美字遠不及矣如籌筆驛詩意中流水遠愁外舊山青又樂意生香之句極佳可惜不見其全集

後村劉氏曰石曼卿詩惟籌筆驛詞翰俱妙人所傳誦及樂意相關禽對語生香不斷樹交花一聯爲伊洛中人所稱他作苦不甚見晚得其集石徂徠作序稱其與穆叅軍以古文自任而曼卿尤豪於詩石自序性懶有作不能錄早時解記數百篇過壯記益衰近幾盡廢有收百篇來者覽之或尚能識或如非已言又迺能辨遂併近詩存三百篇藏之於家歐公尤重其人范公有鑿幽索秘破堅發竒高凌虹霓清出金石之評集中華山泰山嵩山五言長篇各一首筆力在薛能之上餘警句尚多五言云行人晚更急歸鳥夕無行天寒河影淡山凍瀑聲微水盡天不盡人在天盡頭草白有時榮髮白不再好人生不如春髮白不如草弋下失冥鴻網細遺巨

鷓鴣風勁香逾遠天寒色更鮮秋天買不斷無意學金錢七言
云洛渚微波長映步漢宮香水不濡肌獨步世無吳苑豔渾
身天與漢宮香耻無湯武干戈域寧死唐虞揖遜區汾河不
斷天南流天色無情淡如水南朝文物盡清賢不事風流即
放言三百年間却堪笑絕無人可定中原中散向人踈懶甚
步兵因酒過差多皆清拔有氣骨

呂文靖集五卷

陳氏曰丞相許國文靖公壽春呂夷簡坦夫撰文靖不以文
鳴而其詩清潤和雅未易及也

陳亞之集一卷

晁氏曰陳亞字亞之性滑稽喜賦藥名詩仕至司封郎中藥
名詩始於唐人張籍有五臯歲暮相逢地黃葉霜前半下枝
之詩人謂起於亞實不然也

陳氏曰咸平五年進士有集三卷藥名詩特其一體耳如馬
嘶曾到寺犬吠乍行村吏辭如賀日民送自迎時皆佳句不
在此集也

金陵覽古詩三卷

陳氏曰虞部員外郎楊備撰億之弟也

李問集一卷

陳氏曰國子博士廣陵李問舜俞撰

蘇才翁集一卷

晁氏曰蘇舜元字才翁子美兄也工草隸詩章豪麗
晁君成集十卷別集一卷

陳氏曰新城令晁端友君成撰東坡爲作序補之其子也
東坡序畧曰晁君成君子人也吾與之游三年知其爲君子
而不知其能文與詩而君亦未嘗一語及此者其後君旣沒

其子補之出君之詩三百六十篇讀之而驚曰嗟呼詩之指雖微然其美惡高下猶有可以言傳而指見者至於人之賢不肖其深遠茫昧難知蓋甚於詩今吾尚不能知君之能詩則其所謂知君之爲君子者果能盡知之乎君以進士得官所至民安樂之惟恐其去然未嘗以一言求於他人凡從事二十三年而後改官以沒由此觀之非獨吾不知舉世莫知之也君之詩清厚靜深如其爲人而每篇輒出新意奇語宜爲人所共愛其勢非君深自覆匿人必知之而其子補之於文無所不能博辨俊偉絕人遠甚將必顯於世吾是以知有其實而辭其名者之必有後也

杜師雄詩一卷

晁氏曰皇朝杜默字師雄徂徠人石介作三家篇所謂歌之豪者蘇子瞻頗陋之

鄭成之集十卷

晁氏曰皇朝鄭褒字成之閩人登進士第慕韓愈爲文陳詒爲編次其集張景爲之序

將歸集一卷

晁氏曰未詳何人有題林逋隱居詩當是昭陵時人也

徐仲車詩一卷

晁氏曰皇朝徐積字仲車東苑人

黃虞部詩一卷

晁氏曰皇朝黃觀昭陵時嘗將漕成都

邵堯夫擊壤集二十卷

晁氏曰皇朝邵雍堯夫隱居洛陽熙寧中與常秩同召力辭不起遂於易數始爲學至二十年不施枕榻睡其精思如此歌詩蓋其餘事亦頗切理盛行于時卒謚康節集自爲序

朱子語錄康節之學其骨髓在皇極經世書其花草便是詩
韓持國詩三卷

晁氏曰韓維字持國億之子也與其兄子華玉汝俱位宰相
持國最能詩世傳其醅醲絕句他多稱是

註荆公詩十五卷

陳氏曰參政眉山李壁季章撰謫居臨州時所作助之者曾
極景建魏鶴山作序

石林詩話曰荆公少以意氣自許故詩語惟其所向不復更
為涵蓄如天下蒼生待霖雨不知龍向此中蟠又濃綠萬枝
紅一點動人春色不須多又平治險穢非無力潤澤焦枯是
有才之類皆直道其胸中事後為郡牧判官從宋次道盡假
唐人詩集博觀而約取晚年始盡深婉不迫之趣乃知文字
雖工拙有定限然必視其幼壯雖公方其未至亦不能力強

而遽至也

又曰荆公晚年詩律猶精嚴造語用字間不容髮然意與言
會言隨意遣渾然天成殆不見有牽率排比處如含風鳴綠
鱗鱗起弄日鵝黃裊裊垂讀之初不覺有對偶至細數落花
因坐久緩尋芳草得歸遲但見舒閑容與之態耳而字字細
攷之皆經縻括權衡者其用意亦深刻矣常與葉致遠諸人
和頭字韻詩往返數四其末篇云名譽子真居谷口事功新
息困壺頭以谷口對壺頭其精切如此後數月取本追改云
豈愛京師傳谷口但傳鄉里勝壺頭今集中兩本並存
漫叟詩話荆公定林後詩精深華妙非少作之比嘗作歲晚
詩云月映林塘靜風涵笑語涼俯窺伶淨綠小立佇幽香携
幼尋新葯扶衰上野航延緣久未已歲晚惜流光自以比謝
靈運議者亦以為然

後山詩話魯直謂荆公之詩莫年方妙然格高而體下如云自聞青秧底復作龜兆坵乃前人所未道又云扶輿度陽燄窈窕一川花謂包含數个意雖前人亦未道然學三謝失於巧耳

又云荆公詩云力去陳言誇末俗可怜無益費精神而公平生文體數變莫年詩益工用意益苦故言不可不謹也

張浮休評王介甫詩如空中之音相中之色欲有執着而曾不可得

臨川詩選一卷

陳氏曰汪藻彥章得半山別集皆罷相山居時老筆過江失之遂於臨川集錄出又言有表啓十餘篇不存一字

註東坡詩四十二卷年譜目錄各一卷

司諫吳興施元之德初與吳郡顧景蕃共為之元之子宿從

而推廣且為年譜以傳於世陸放翁作序頗言註之難蓋其

一時事實既非親見又無故老傳聞有不能盡知者噫豈獨

坡詩哉註杜詩者非不多往往穿鑿附會皆臆決之過也

張浮休評子瞻詩如武庫初開戈矛森然觀者不覺神懍若

一一尋之不無利鈍

放翁陸氏序畧曰唐詩人最盛名家者以百數惟杜詩註者

數家然繁不為識者所取近世有蜀人任淵嘗註宋子京黃

魯直陳無已三家詩頗稱詳贍若東坡先生之詩則援據闕

博指趣深遠淵獨不敢為之說某頃與范公至能會於蜀因

相與論東坡詩慨然謂余足下當作一書發明東坡之意以

遺學者某謝不能後二十五年某告老居山陰吳興施宿武

子出其先人司諫公所註數十大篇屬某作序司諫公以絕

識博學名天下且用工深歷歲久又助之以顧君景蕃之該

洽則於東坡之意蓋幾可以無憾矣

山谷集十一卷外集十一卷別集二卷

陳氏曰黃廷堅魯直撰江西所刻詩派即豫章前後集中詩也別集者慶元中莆田黃汝嘉增刻

山谷編年詩集三十卷年譜二卷

陳氏曰山谷詩文其甥洪氏兄弟所編斷自進德堂以後今外集所載數卷有晚年刪去者故任子淵所註亦惟取前集而已監丞黃留子耕者其諸孫也即會粹別集復盡取其平生詩以歲月次第編錄且為之譜今刊板括蒼

後山集六卷外集五卷

陳氏曰陳師道無已撰亦於正集中錄出入詩派江西宗派之說出於呂本中居仁前輩固有議其不然者矣後山雖曰見豫章之詩盡棄其學而學焉然其造詣平澹真趣自然實

豫章之所闕也

註黃山谷詩二十卷註後山詩六卷

陳氏曰新津任淵子淵註鄱陽許尹為序大抵不獨註事而兼註意用工為深二集皆取前集陳詩以魏衍集記冠焉後村劉氏曰國初詩人如潘閔魏野規規晚唐格調寸步不敢走作楊劉則又專為崑體故優人有擗批義山之誚蘇梅二子稍變以平淡豪俊而和之者尚寡至六一坡公巍然為大家數學者宗焉然二公亦各極其天才筆力之所至而已非必鍛鍊勤苦而成也豫章稍後出會粹百家句律之長究極歷代體製之變蒐獵奇書穿穴異聞作為古律自成一家雖隻字半句不輕出遂為本朝詩家宗祖在禪學中比得達磨不易之論也其內集詩尤善信乎其自編者頃見趙履常極宗師之近時詩人惟趙得豫章之意有絕似之者

又曰後山樹立甚高其議論不以一字假借人然自言其詩師豫章公或曰黃陳齊名何師之有余曰射較一鏃奔角一着惟詩亦然後山地位去豫章不遠故能師之若同秦晁諸人則不能為此言矣此惟深於詩者知之文師南豐詩師豫章二師皆極天下之本色故後山詩文高妙一世然題太白畫像云江西勝士與長吟後來不憂身陸沉勝士謂饒德操也按德操此詩去手污吾足之作大爭地位太白非德操遂陸沉耶似非篤論

盧載雜歌詩一卷

陳氏曰盧載厚元撰集中有與胡則錢惟演往來詩

琴軒集一卷

陳氏曰題南榮浪翁李有慶撰與石昌言任師中同時卷末贈答十二絕闕其六其曰癸巳歲者殆皇祐中耶

元章簡詩集十卷

陳氏曰叅政元絳厚之撰

劉景文集十卷

陳氏曰左藏庫使知潞州劉季孫景文撰環慶死事將平之子也東坡嘗薦之坡在杭季孫寄詩有四海共知霜鬢滿重陽曾插菊花無之句其詩忼慨有氣如其為人

廣風味集五卷

陳氏曰吏部侍郎南京王欽臣仲至撰

海門集八卷

陳氏曰渤海張重撰有上蘇子瞻內翰詩又有張伯玉遊鑑湖晚歸詩伯玉知越州當嘉祐末而東坡為翰苑在元祐間重皆與同時特未詳其人

王岐公宮詞一卷

陳氏曰王珪禹玉撰

逸民鳴一卷

陳氏曰盱江李樵撰泰伯之姪孫

湛推官集一卷

陳氏曰長樂湛鴻季潛撰紹聖初韓昌國序

青山集三十卷

陳氏曰朝奉郎當塗郭祥正功父撰初見賞於梅聖俞後見知於王介甫仕不達而卒李端叔晚寓其鄉祥正與之爭名未嘗同堂至為俚語以譏訕則其為人不足道也

張浮休評郭祥正詩如大排筵席二十四味終日揖讓而適口者少

方秘校集十卷

陳氏曰莆田方惟深子通撰其父屯田龜年葬其遂為吳人

與朱伯原善以女嫁伯原之子嘗舉進士冠其鄉不第晚得興化軍助教年八十三以卒王荆公最愛其詩精詣警絕始余得其詩二卷乃其姪孫蕭山宰翺所編後乃知莆中嘗刊板為十卷且載程俱致道所作墓誌於末曾慥詩選直以為姑蘇人者誤也詩選又言荆公愛其春江渺渺一絕手書之遂載臨川集曾紆南游記舊亦云而其詩則客帆收浦者也二詩皆不在今集中豈以臨川集已收故耶二本大畧同亦微有出入

慶湖遺老集九卷拾遺二卷

陳氏曰朝奉郎共城賀鑄方回撰自序言外監知章之後且淮本其初出王子慶忌以慶為姓居越之湖澤今所謂鏡湖者本慶湖也避漢安帝父清河王諱改為賀氏慶湖亦轉為鏡未知其說何所據也其東山樂府張文潛序之鑄後居吳

下葉少蘊為作傳詳其出處且與米芾齊名然鑄生皇祐壬辰視米葉猶為前輩也

操縵集五卷

陳氏曰周邦彥撰亦有全集中所無者

司馬才仲夏陽

晁氏曰司馬才仲溫公之姪孫元祐初與王當輩同中

賢良科調官致塘喜賦宮體詩故世傳其為鬼物所崇而卒

司馬才叔逸堂

晁氏曰司馬才叔才仲之弟也登進士第亦嘗應賢良

以黨錮不召詩雖纖艷比其兄稍莊雅

得全居士集三卷

陳氏曰趙鼎元鎮撰全集號忠正德文其曾孫壁別刊其詩

附以樂府陸游曰忠簡適朱崖臨終自書銘旌曰身騎箕尾

歸天上氣作山河壯本朝嗚呼可不謂偉人乎

高隱集七卷

陳氏曰高隱處士蘄春林敏功子仁撰嘗以春秋鄉薦不第

有詩文百卷號蒙山集兵火後不存

無思集四卷

陳氏曰林敏修子來撰敏功之弟

後村劉氏曰三林詩極少曾端伯作高隱小傳云有詩文百

二十卷今所存十無一二兄弟皆隱君子不獨以詩重

柯山集二卷

陳氏曰齊安潘大臨邠老撰所謂蒲城風雨近重陽者也

後村劉氏曰東坡文潛先後適黃州皆與邠老游其詩自云

師老杜然有空意無實力余舊讀之病其深蕪後見夏均父

讀邠老詩亦有深蕪之評

經籍傳
文獻通考卷二百四十四
溪堂集五卷補遺二卷

陳氏曰臨川謝逸無逸撰

漫叟詩話謝無逸學古高傑文詞煅煉篇篇有古意尤工於詩

冷齋夜話無逸工詩能文黃魯直讀其詩曰晁張流也恨未識之耳無逸詩曰老鳳垂頭噤不語枯木槎牙噪春鳥又曰貪夫蟻旋磨冷官魚上竿又曰山寒石髮瘦水落溪毛彫皆為魯直所稱賞

竹友集七卷

陳氏曰謝邁幼槃撰逸之弟

後村劉氏曰呂紫微評無逸詩似康樂幼槃詩似元暉按康樂一字百鍊乃出冶元暉尤麗密無逸輕快有餘而欠工緻幼槃差苦思其合元暉者亦少然弟兄在政宣間科舉之外

有岐路可進身韓子蒼諸人或自斃其技至貴顯二謝乃老死布衣其高節亦不可及

日涉園集十卷

陳氏曰廬山李彭商老撰公祥之從孫

後村劉氏曰商老公擇尚書家子弟也東坡山谷文潛諸公皆與往還頗博覽強記然詩體拘狹少變化

清非集一卷

陳氏曰豫章洪朋龜父撰

老圃集一卷

陳氏曰諫議大夫洪芻駒父撰

西渡集一卷

陳氏曰中書舍人洪炎玉父撰洪氏弟兄四人其母黃魯直之妹不淑早世所為賦毀壁者也龜父舉進士不第其季羽

鴻父坐上書元符入籍終其身芻炎皆貴而芻靖康失節貶廢羽詩不傳

後村劉氏曰三洪與徐師川皆豫章之甥龜父警句往往前人所未道然早卒惜不多見駒父言尤工初與龜父游梅仙觀龜父有詩卒章云願為龍鱗嬰勿學蟬骨蛻是以直節期乃弟矣駒父後居上坡晚節不終不特有媿於舅氏亦有媿於長君也王父南渡後為少蓬聞師川召有懷駒父詩云欣逢白鶴歸華表更想黃龍出羽淵然師川卒不能返駒父於鯨波之外王父愛兄之道至矣余讀而悲之

岷山百境詩二卷

晁氏曰王家字道輔少有能詩名世謂其詩初若不經意然遣辭屬意清麗絕人自號南陔居士宣和中以狂譎被譖伏誅

楊天隱詩十卷

晁氏曰皇朝楊恬字天隱潼川人

文獻通考卷之二百四十四

